

Ekalesia Faapotopotoga Kerisiano i Amerika Samoa

AU LEOLEO 2018



la Tatalo ma Mataala

UPU TOMUA

O le aao malosi ma le mataisau o le Leoleo Mamoe Sili, sa taitaiina mai ai la tatou folauga. O lea ua tatou aulia manuia mai ai lenei tausaga fou i lona alofa ma lona filemu. Ma ua matuā onomea ai ona tatou momoli lapalapa o mālo ma faafo'i le viiga ma le faafetai i lo tatou Atua, nei e oo i le faavavau, faavavau lava.

Malo le folau!! Faafetai le fai tatalo. Ua faamanatu mai pea e le poto o Solomona mo i tatou le tatalo e fiafia ma fia faafofoga i ai le Alii.

O le taulaga a e amioleaga e inosia lea e le Alii, a o le tatalo a e amio sa'o o lona lea fiafia...E mamao le Alii i e amioleaga; a e faafofoga mai o ia i le tatalo a e amiotonu. Faataoto 15:8,29

Ia le Ekalesia ma le afaatuatua, ua valaauina tatou, ina ia tatou faamalolosi ma finafinau e saili ala e fiafia le Alii e faafofoga ma i ai. Ia tu'u tasi ia le upega, ma afa e tasi o tatou loto i luma o le Atua le Leoleo Mamoe Sili, ina ia to mai manū mo ana feau ma galuega o le a feagai ai i lenei tausaga.

O le Susuga i le Toeaina o Kalasa Manino Afuola ma Frank Papu (FS) o le Matagaluega a Hawaii sa feagai ma le tapenaina o lenei taiala e fesoasoani atu i la tatou Ekalesia ma le aufaitatalo. Faafetai tapena! Malo le tauata'i!

Ia manuia le folauga a le Ekalesia ma Mafutaga Tatalo a le Au Leoleo i lenei tausaga.

Soifua

Tautalatasi Fanolua FT
Peresitene, Mafutaga Au Leoleo

TA'UTINOGA MAFUTAGA AU LEOLEO

Ou te ta'utino atu, o le Mafutaga a le Au Leoleo, o le mafutaga tatalo a le Ekalesia, e galueaina ai le ola faaleagaga o le 'au faatuatua i le Atua.

Ou te ta'utino atu foi, o le Atua o le Agaga lava ia, e su'eina o tatou agaga ma fuatia o tatou loto.

O le mea lea ou te ta'utino atu, o le a ou su'esu'e ifo i lo'u ola, ma ou toaga i mafutaga tatalo ma tapuaiga, atoa ma mea fai uma a le Ekalesia. Ina ia ou le tama/teine pea i le faatuatua, a ia oo i le ua matua i le agaga.

Ou te ta'utino atu o le a fai ma a'u tatalo tauave:

Le Alii e, ia e alofa mai ia te a'u le tagata agasala. Ia e foai mai le loto tele e suia ai mea ua tatau ona sui, ma le to'afilemu e talia ai mea e lē tatau ona suia, ma foa'i mai le atamai e iloa ai le eseese o ia mea. Ia oo mai lou malo, ma ia faia lou finagalo i le lalolagi e pei ona faia i le lagi. Amene!

IANUARI

Ianuari 1 – 06, 2018

Tusi Faitau: Mataio 28:16-20

Matua: Mataio 28:20....Ia outou a'oa'o atu ia te i latou ia tausii mea uma ua ou fai atu ai ia te outou; fa'auta fo'i, oute ia te outou i aso uma lava, e o'o lava i le gata'aga o le lalolagi.

Manatu Autū: **Malaga ma le Keriso Toe Tu**

Tatou fa'afetai i le Atua:--

- i. Ona ua avea lona manumālō e fai ma mautinoa mo i tatou lana fanau femēmēa'i, ma malamalama ai le pogisā i loto o i tatou uma ua vala'auina e fai ma so'o o lo tatou Ali'i.
- ii. Auā ua aumaia fo'i e lona manumālō le mālosi fou e aga'i ai pea i luma ma le 'oli'oli loloto, e tala'i atu le Tala Lelei o le Fa'aolataga i nu'u uma.
- iii. Ona o lona māfuta mai, e manino ai la tatou va'ai i lo tatou lumana'i manuia.

Tatou fa'ato'ese i le Atua:--

- i. Ona ua tatou tauaso fa'a-le-agaga, ma ua fai lea ma lape o le iloa manino o lo tatou vala'auina.
- ii. Ona ua tatou fa'amamafa le mea 'ese ma le sesē, a ua lafoa'i le Keriso Toe-Tu e saogalēmū ai la'asaga ole ala.
- iii. Ina ua tatou te'ena pea lona māfuta mai e ala i lona Agaga Paia, ma ua vāivāi ai pea lo tatou fa'atuatua ia te ia lo tatou Ali'i ta'iala.

Tatou tatalo i le Atua:--

- i. Ina ia fa'aalia mai pea lona finagalo mo i tatou i taimi uma o la tatou faigamalaga, ma ia fa'atamao'aigaina ai o tatou faiva.
- ii. Ina ia lē aunoa lona a'oa'o mai pea o i tatou uma lana fanau agasala, ia maua ai le poto fa'a-le-agaga e tausiniō ai mo lona vi'iga.
- iii. Ina ia avea pea i tatou e fai mona so'o, ma ia fua tele mai ai galuega o lo'o tatou faia ona o lona fesoasoani mai.



Ianuari 07 – 13, 2018

Tusi Faitau: 1 Nofoaiga Tupu 11:1-3

Matua: 1 Nofoaiga Tupu 11:2.... ‘O anamua fo’i, ina o fai Saulo ma tupu, o oe lava na e feta’ita’iina a’i ia Isaraelu. Na fetalai mai fo’i le Ali’i lou Atua ia te oe, O oe e te leoleo i lo’u nu’u o Isaraelu, e fai fo’i oe ma ta’ita’i i lo’u nu’u o Isara’elu.

Manatu Autū: **Filifilia e feagai ma le Atua**

Tatou fa’afetai ile Atua:--

- i. Ona o ana tōfiga ua māfua ai ona tatou maua le avanoa e fai ai ma ta’ita’i i lana galuega.
- ii. Auā ua lē o se agava’a o se tagata, a’o lona finagalo alofa ua pogai ai le amana’iaina o i tatou i ana tofiga.
- iii. Auā o lona finagalo ua tatou osi feagaiga ai ma ia, ma ua fausia ai le so’otaga ole tagata agasala ma ia le Atua pa’ia.

Tatou fa’ato’ese i le Atua:--

- i. Ona ua tatou lē maua le lagona moni o ana filifiliga mo i tatou, e ala i lona amata mea i lo tatou ola auauna.
- ii. Ona ua tatou manatu tele i lo tatou iloa ma le mālosi ua maua, ae fa’atuana’i le finagalo alofa o le Atua na māfua ai.
- iii. Ona ua leai se fa’atuatua e iloa ai lona manatu mai e ala i ana filifiliga, ae maise lava ina ua pulea i tatou e le mitamita vale i agava’a ua tatou maua.

Tatou tatalo ile Atua:--

- i. Ina ia fa’apupulaina pea mata o tatou agaga, e iloa tonu ai ana tofiga mo i tatou mo le manuia lautele.
- ii. Ina ia avefa pea lona Agaga Pa’ia, ma ala e iloa ai lona musumusuina o i tatou e galulue i faiva ua ia finagalo iai.
- iii. Ina ia fa’ateleina lo tatou fiafia e fa’alogo atu i lona fetalai mai e ala i ana afioga Paia, o le ala lea e malamlama ai i ana fa’asinomaga mo lo tatou ola.

Ianuari 14 – 20, 2018

Tusi Faitau: Salamo 1:1-6

Matua: Salamo 1:6....Auā ua silafia e le Ali'i le ala o ē amiotonu; ae fano lava le ala o e amio leaga.

Manatu Autū: **Olaga mamā e i'u i le manuia**

Tatou fa'afetai ile Atua:--

- i. Auā o ia lava lo tatou ala i le manuia, na te ta'ita'iina ai i tatou lona nu'u ma taunu'u atu ai ile manuia.
- ii. Auā o ia fo'i ua maua ai le poto ma le mālosi e filifili tonu ai le tagata i ona ala mama ma le pa'ia.
- iii. Auā ua ia lē tu'ulafoa'ina i tatou ina ia fano i ala sesē, ae fa'amaoni lona alofa e suia ai o tatou ala tuai i ala fou.

Tatou fa'ato'ese i le Atua:--

- i. Ina ua faia pea o tatou loto ile filifilia lea o ala leaga ma le inosia e tau atu ile malaia, a ua lafoa'i ala o le amiotonu e tau atu ile fa'aeaina.
- ii. Ona o lo tatou uia pea o ala to'ilalo ma le matagā i tausaga uma, ma aliali ai lo tatou ola fouvale i lona finagalo alofa.
- iii. Ona ua tatou te'ena pea le musumususu mai o lona Agaga, ma ua lē maua ai le salamō e fa'afouina ai o tatou ala.

Tatou tatalo ile Atua:--

- i. Ina ia līua o tatou tagata tuai i le mana o lona Agaga Pa'ia, e lafoa'i ai ala o lenā tausaga ua tuana'i, ae fa'asaga atu ile ala o lo'o ia fa'asinoina mai.
- ii. Ina ia fuata mai i fua lelei ua ia finagalo iai lo tatou ola auauna ia te ia, e ala lea ina ua tatou savavali i lana amiotonu.
- iii. Ina ia fai i tatou ma fa'ata'ita'iga sili mo i latou ua fia mulimuli i ala o lo tatou Atua, ma susulu atu ai lona malamalama i le pogisā.



Ianuari 21 – 27, 2018

Tusi Faitau: Ioane 10:1-5

Matua: Ioane 10:4.... 'Pe ā tu'uina atu e ia ana lava mamoe, e muamua atu ia iai; ona mulimuli atu ai lea o mamoe ia te ia, auā ua latou iloa lona leo.

Manatu Autū: **Fa'alogo i lona Si'ufofoga**

Tatou fa'afetai ile Atua:--

- i. Auā o lona si'ufofoga amiotonu e ta'ita'iina ai i tatou ile vao lafulēmū, ma maua ai le mapusaga mo o tatou agaga.
- ii. Ona o lona si'ufofoga alofa ma le fa'amaoni, ua aumaia ai le mafanafana mo i tatou i ituaso mafatia.
- iii. Auā ua tatou ta'o'oto ma savavali fiafia i le malamalama o lona fetalai mai.

Tatou fa'ato'ese i le Atua:--

- i. Ina ua avea leo sesē o i tatou lana lafu mamoe ma ala ua fa'asesēina ai isi māmoe, ma ua tupu ai le fete'ena'i o lona finagalo ma ta'ita'iga ua tatou faia.
- ii. Auā ua ulufafo atu nisi o lona fanau ona ole mativa o lo tatou a'oa'o atu ile fa'atuatua.
- iii. Ona ole vaivai tele lo tatou fa'alogo atu i lona si'ufofoga e maua ai le ta'ita'iga amiotonu, ma ua fai lea ma ala o lo tatou le o'o atu i taunu'uga fiafia.

Tatou tatalo i le Atua:--

- i. Ina ia a'oa'o mai lona Agaga mo i tatou e iloa ai ona usita'i atu i lona si'ufofoga o lo'o fetalai mai.
- ii. Ina ia a'oa'oina i tatou lana lafu mamoe, ia malamalama ai i lona si'ufofoga e ala ile tatalo, ma saunia ai e mulimuli ma le loto maulalo.
- iii. Ina ia fa'atupuina le fiafia e avea ma si'ufofoga o Keriso e ala i galuega lelei, ma atagia ai le soifuaga o le Leoleo Mamoe Lelei i galuega, ae lē na'o upu.

FEPUARI

Ianuari 28 - Fepuari 03, 2018

Tusi Faitau: Fa'amasino 5:1-5

Matua: Fa'amasino 5:2.... 'Auā o le ta'ita'ina o Isara'elu e ali'i ta'i 'au ma le ofo fua mai o le nu'u, ia outou fa'amanū ile Ali'i.

Manatu Autū: **Ole Atua Ta'iala e ao ona vi'ia**

Tatou fa'afetai i le Atua:--

- i. Ona o lana ta'ita'iga saogalēmū, ua avea ai i tatou lana fanau e fai ma ta'ita'i o aiga, o nu'u, atoa ai ma lana Ekalesia.
- ii. Ona o lana vala'au alofa mo i tatou tagata fa'atauva'a, ma ua iloa tino ai lona amana'iaina o i tatou e galulue mo lona finagalo.
- iii. Ona o lana ta'ita'iga amiotonu, ua aumaia ai le avanoa tatou te vivi'i ma fa'amanū atu ai i lona suafa mamalu.

Tatou fa'ato'ese i le Atua:--

- i. Ina ua avea i tatou ma ta'ita'i leaga ma le loto ma'a'a, ua sesē ese ai lana fanau o lo'o fia maua lona manuia.
- ii. Auā ua tatou lē fa'alogo atu i le mea o lo'o ia finagalo iai, a ua fai lava le mea tatou te manana'o ai.
- iii. Ona ua avea tofiga ta'ita'i, ma ala e sa'ili ai o tatou lava mamalu ma vi'iga, a ua lafoa'i lona malamalama o lo'o susulu tele mai.

Tatou tatalo i le Atua:--

- i. Ina ia a'oa'o mai pea lona Agaga ia i tatou, e mafaia ai ona fa'asagatonuina lo tatou ola auauna ia te ia.
- ii. Ina ia tonu le ta'ita'iina o lana galuega ae maise o aiga ma le mālō, ina ua usita'i atu le auauna ia te ia le Ta'ita'i Sili.
- iii. Ina ia iloa ona taualuga galuega lelei uma ua faia i lona lava vi'iga, ma avea ai pea i tatou ma ta'ita'i amioatua.

Fepuari 04 – 10, 2018

Tusi Faitau: Luka 20:19-26

Matua: Luka 20:25.... Ona fetalai atu lea o ia ia te i latou, “O mea a Kaisara ia outou avatu ia Kaisara; a’o mea a le Atua avatu ia i le Atua.”

Manatu Autū: **Auauna fa’amaoni ile Atua**

Tatou fa’afetai i le Atua:--

- i. Ona ole avanoa ua ia tu’uina mai e avea ai i tatou ma auauna, ma ua fa’a’ato’atoaina ai lo tatou loto atu i galuega ua ia tofia iai tatou.
- ii. Auā ua ia fa’atupuina pea le fa’atuatua e faia ai mea silisili mo ia, e ala i lona mafuta mai, ma ua tatou alolofa atu ai i lana fanau puapuagatia.
- iii. Ona o lona a’oa’o mai o i tatou i ana Afioga, ua iloa atili ai o ia lava ole pule aoao o mea uma.

Tatou fa’ato’ese i le Atua:--

- i. Ona ua fenumia’i pea o tatou loto i le masalosalo vale ma le taulamalama, ua tupu ai le tu’ufesili pea o i tatou i fa’asinomaga tonu o lo tatou olaga tautua ia te ia.
- ii. Ona ua tatou le iloa le pule aoao a le Atua na foafoaina ai mea uma, ma ua fa’asesēina ai pea o tatou loto e le fia pule.
- iii. Auā ua lē atoa le ofoina atu o mea sli e tatau mo ia, ona ole manatu fa’apito ma le losilosile vale i mea o le ola nei.

Tatou tatalo i le Atua:--

1. Ina ia ave’esea le fa’alotolotolua, ae foa’i mai le loto fa’amaoni e galulue ai mo ia ile agaga e tasi.
2. Ina ia tineia le manatu fa’apito ma le taulamalama, ae foa’i mai le loto mau e faia ai le mea sili mo lo tatou Matai.
3. Ina ia iloa le pule a le Atua i mea uma na ia faia, ma ia sili fo’i ona iloa le leai o se mea tatou te pule ai i lenei lalolagi.

Fepuari 11 - 17, 2018

Tusi Faitau: Esoto 16:4-8

Matua: Esoto 16:8.... 'Ua fai atu fo'i Mose, A afiafi e foa'i mai ai e le Ali'i ia te outou o manu tou te a'ai ai, o le taeao fo'i e foa'i mai ai le mea e 'ai tou te ma'o'ona ai lava; ina ua fa'afogaina e le Ali'i lo outou muimui tou te muimui ai ia te ia; auā o ai ea i ma'ua nei? E lē o i ma'ua, a'o le Ali'i tou te muimui iai.'

Manatu Autū: **Talitonu ile Atua tali mana'o**

Tatou fa'afetai i le Atua:--

- i. Ona o lona a'ao agalelei ua fa'amalieina ai lo tatou galala, o le fafagaina lea o i tatou i taumafa ole tino, ae maise fo'i o tamao'aiga fa'a-le-agaga.
- ii. Auā ua na lē tu'uina atu i tatou ina ia matelāina, a ua ia a'apa mai e ala i lona alofa tunoa, ua tupu ai le vi'iga tele o lona Suafa.
- iii. Ona o le soifua pa'ia o lo tatou Ali'i Agalelei, ua ato'atoa ai le fafagaina o i tatou ile Ola Fa'avavau, ma ua mausalī ai lo tatou fa'amoemoe.

Tatou fa'ato'ese i le Atua:--

- i. Ona ua tatou ave le fa'amuamua i mea o le tino nei, ma ua fa'ateleina ai lo tatou matitiva fa'a-le-agaga.
- ii. Auā ua aunoa o tatou agaga ma le talitonu fa'amaoni ile Atua o le puna o mea lelei uma, ma ave'esea ai lona mamalu mai galuega ua tatou fa'atinoina.
- iii. Ina ua avea i tatou ma fanau ole muimui, ua aliali ai lo tatou tu'ulafoa'ina o le Atua lo tatou Matai alofa.

Tatou tatalo i le Atua:--

- i. Ina ia liliuina e lona Agaga o tatou loto faigatā, ma ia tupu mai ai le loto talitonu ia te ia le puna o manuia.
- ii. Ina ia fua tele mai fua o le onosa'i ma le fa'apalepale, e fa'atalitali ai i lona fa'aali mai i ona lava taimi.
- iii. Ina ia ave'eseina le manatu e fa'amuamua i mea o le tino nei, a ia tu'uina atu pea le fa'atuatua ile Atua e faia ai lana pule i lona alofa mo i tatou.

Fepuari 18 – 24, 2018

Tusi Faitau: Galuega 5:12-16

Matua: Galuega 5:12.... ‘Ua faia e lima o le au aposetolo fa’ailoga ma vāvega e tele i luma o le nu’u. Sa i le fa’apaologa o Solomona fo’i i latou uma lava ma le loto gatasi.

Manatu Autū: **Fusia fa’atasi e lona Mana**

Tatou fa’afetai ile Atua: Ona o lona Mana fai vāvega ua fa’aalia ai lona silisili ese, ma aumaia fa’atasi ai lana fanau fa’atuatua ile loto ma le mafaufau e tasi.

- i. Ona o le Mana lava lea ua mafaia ai e lana Aufaigaluega ona fa’aali atu lona mamalu i tagata uma, ma avea ai lana Ekalesia ma molimau ola o lana fa’aolataga.
- ii. Ona o le Mana fo’i lea ua tupu ai le loto gatasitasi o lana fanau fa’atuatua, ma ua tineia ai le fefulituaa’i ma le felotoleagaa’i.

Tatou fa’ato’ese ile Atua:--

- i. Ona o lo tatou tatou le fa’atuatua moni i lona Mana fa’amālōlō, ua aunoa ai i tatou ma le iloa moni o ana vavega o lo’o faia pea.
- ii. Ona ua fe’ese’esea’i o tatou loto, ma ua lilo ai lona finagalo moni o lo’o fa’aali mai i taualumaga o lo tatou ola.
- iii. Ona ua lē atagia fōliga mamalu o lo tatou Atua i lo tat ou nonofo fefulituaa’i, ma ua avea ai la tatou molimau ma ala e tausuai ai tagata o lo’o matamata mai.

Tatou tatalo ile Atua:--

- i. Ina ia fa’asa’olotoina o tatou loto mai saisaitiaga leaga, ua lē mafai ai ona auala atu ia te i tatou fa’aaliga o lona alofa tunoa.
- ii. Ina ia pulea mai e lona Agaga Pa’ia o tatou loto, ma ia fa’aali atu ai ile lalolagi o i tatou lava o lana fanau.
- iii. Ina ia moni le tasi o i tatou ile loto, a ia lē na’o upu, e avea ai lo tatou vala’auina e fai ma au’upega mo ana vāvega ile lalolagi.



MATI

Fepuari 25 - Mati 03, 2018

Tusi Faitau: Isaia 52:13-15

Matua: Isaia 52:15... 'E fa'apea ona sausauina e ia o nu'u e tele; ona o ia e punitia ai e tupu o latou lava fofoga; auā latou te va'aia le mea na lē talatalaina ia i latou, latou te iloa fo'i le mea na latou lē fa'alogo iai.'

Manatu Autū: **E loloto fuafuaga o le Ola**

Tatou fa'afetai atu ile Atua:--

- i. Auā ua na lē nātia le manuia mo ona tagata, ma ua lē taofia fo'i le o'o mai o lea manuia ona o lo tatou tauaso fa'a-le-agaga.
- ii. Ona o lona liliuina pea o ala maulalo ma le fa'alumaina, e auala mai ai lona alofa lavea'i mo ona tagata uma.
- iii. Ona o lona finagalo alofa lava, ae lē o se amio a le tagata ua maua ai le lavea'iina o le lalolagi, ma o le vāvega ofoofogia lava lea.

Tatou fa'ato'ese ile Atua:--

- i. Ona o le vāivāi o lo tatou ola vivi'i ia te ia le Atua e to'atasi ua na saunia le fa'aolataga sili mo i tatou.
- ii. Auā ua tatou tauaso e iloa atu ana fuafuaga loloto mo lo tatou manuia, ina ua taula'i tele la tatou va'ai i a tatou lava fuafuaga i'uvale.
- iii. Ona ua fa'amamafa lo tatou poto, ae lafoa'i ana fa'aaliga na te fuafuaina ai le manuia moni mo i tatou lana fanau fa'atuatua.

Tatou tatalo atu ile Atua:--

- i. Ina ia avea i tatou e fai ma auauna, e ofoina atu moni o tatou tagata mo ia mai le loloto o puapuagā.
- ii. Ina ia ave'esea le sa'ili'ili mamalu ma le fa'alologologo-tīgā ile galuega, a ia ofoina atu uma lo tatou malosi e ui ile inosia ma le fa'alumaina.
- iii. Ina ia fa'amatalaloto mai pea lona Agaga e iloa ai lona fa'aali mai, ma fa'amalosia ai fo'i lo tatou ola fa'atuatua e fetaia'i ai ma lu'itau o le avea ma auauna.

Mati 04 - 10, 2018

Tusi Faitau: Mareko 13:9-13

Matua: Mareko 13:13....'E inosia fo'i outou e tagata uma ona o lo'u igoa; a'o lē tūmau se'ia o'o ile i'uga, e fa'aolaina lea.

Manatu Autū: **Suamalie puapuagā**

Tatou fa'afetai ile Atua:--

- i. Ona o lona Agaga Pa'ia ua mafaia ai ona tatou fetaia'i ma lu'itau tetele ole ola nei.
- ii. Ona o le onosa'i o Keriso ile satauro, ua fai lava lea ma fa'ata'ita'iga mautū mo i tatou i taimi faigatā o le ola auuna ia te ia.
- iii. Ona o le tau tele ua folafolaina mo i tatou lana fanau fa'atuatua, ina ua tatou tumau ma le lē fa'agae'etia.

Tatou fa'ato'ese ile Atua:--

- i. Ona ua lē maua'a lo tatou fa'atuatua ia te ia lo tatou Atua alofa, ma lona māfuta mai e fa'amalosi lo tatou vaivai.
- ii. Auā ua tatou fa'afitia o ia pe ā o'o mai sauaga e taufa'amata'u i lo tatou vala'auina, ua tatou le lagonaina ai le suamalie o le onosa'i i puapuagā.
- iii. Ona ua leai se vi'iga mo ia e maua, ona o le fa'ata'eta'ealuga o lo tatou talitonu i lona finagalo alofa.

Tatou tatalo ile Atua:--

- i. Ina ia foa'i mai le agaga moni e tumau ai ia te ia, ae maise lava i taimi e tetele ai faigatā tatou te fetaia'i.
- ii. Ia saunia e lona lava Agaga Paia i tatou e fai ma mea faigaluega ua sili ona malosi mo lona lava vi'iga. Ia foa'iina tele mai le fa'atuatua e tumau ai i lo tatou vala'auina, ina ia maua ai agaga mo ona mālō.
- iii. Ia ave puapuagā o lo tatou Keriso Manumālō, e fai ma fa'amalosi'au i lo tatou vaivai.

Mati 11 - 17, 2018

Tusi Faitau: Mataio 20:29-34

Matua: Mataio 20:32.... Ona tu ai lea o Iesu, ua vala'au atu ia te i la'ua, ona fa'apea atu lea o ia, 'Se ā se mea lua te manana'o iai ou te faia mo oulua?.'

Manatu Autū: **Fa'alogo! Ua fesili mai Iesū**

Tatou fa'afetai ile Atua:--

- i. Auā ua leai se malosi na te mafaia ona taofia lona feso'ota'i mai ia te i tatou lana fanau puapuagatia.
- ii. Ona o lona alofa fa'amaoni ia te i tatou ua mafua ai lona fa'alumaina ma lona maliu.
- iii. Auā ua ia tu'uina mai pea le avanoa tatou te ta'utino atu ai o tatou mana'oga uma, ma ua ia tali mai ma le fiafia e e ala i lona alofa lautele.

Tatou fa'ato'ese ile Atua:--

- i. Ona ua avea i tatou ma pa-pupuni ua taofia ai le feso'ota'i atu o lana fanau mafatia ia te ia.
- ii. Ona ua tatou manatu e mafaia ona tatou tali atu i mafatiaga o lana fanau e aunoa ma lona Mana.
- iii. Ona ua leai se tali ole fa'atuatua tatou te avatua ina ua ia fesiligia i tatou, ma ua i'u ai ina leai ni fa'aaliga o lona Mālō tatou te va'aia.

Tatou tatalo ile Atua:--

- i. Ina ia tatala mai pea e lona Agaga o tatou loto uma, e feso'ota'i atu ia te ia ma le loto fa'atuatua.
- ii. Ina ia tala'iina pea ma le leo tele Tala Ole Ola, e pogai mai i lona lava Alofa Tunoa.
- iii. Ina ia saunia pea i tatou e ala ile fa'atuatua e tali atu ai ma le loto atoa i lona vala'au mai, ma ia liliuina ai i tatou e fai mona so'o, e molimau atu vāvega ua na faia i lo tatou ola.

Mati 18-24, 2018

Tusi Faitau: Luka 19:41-44

Matua: Luka 19:42.... 'ua fa'apea ane, "Ana e iloa, o oe lava i lenei lava aso, o mea e manuia ai! A'o lenei ua lilo i lau va'ai."

Manatu Autū: **Ia pupula mata ole Agaga**



Tatou fa'afetai ile Atua:--

- i. Auā ua ia tatalaina pea le va'ai a i tatou le nu'u lē fa'atuatua, ma iloa atu ai le matagofie o lona Alofa mo le lalolagi uma.
- ii. Ona o lona lē tau mai i lo tatou tauaso fa'a-le-agaga, a ua ia alofa mai pea ma fa'aali mai lona finagalo alofa mo i tatou.
- iii. Ina ia fa'amatalaloto mai pea ana fuafuaga poto mo i tatou ona tagata vaivai, o lana amiotonu lava lea ua tatou ola ai.

Tatou fa'ato'ese ile Atua:--

- i. Auā ua fa'atauaso ina pea i tatou e tu'inaanau o lenei olaga, ua pogai ai ona lilo le alofa tele o lo tatou Ali'i i la tatou va'ai.
- ii. Ona ua fai i tatou ma ala ua lilo ai fo'i ile va'ai atu a nisi o lana fanau o lo'o fia iloa atu lona mamalu.
- iii. Auā ua tatou taofia le o'o atu ole malamalama ile lalolagi pogisā, ona o lo tatou manatu fa'apito.

Tatou tatalo ile Atua:--

- i. Ina ia avea pea lo tatou tauaso ma ala o ana fa'aaliga silisili ese mo lo tatou lavea'iina.
- ii. Ina ia tupu pea le ola vivi'i ina ua va'aia lona fa'aali mai mo i tatou lana fanau agasala.
- iii. Ina ia lavea'iina i tatou uma, e ui ina tatou fa'atamala ile maitauina o lona fa'aali mai i auala mamalu ma le faigofie.

Mati 25 - 31, 2018

Tusi Faitau: Ioane 19:17-22

Matua: Ioane 19:19.... 'Ua tusia fo'i e Pilato o le fa'aaliga, ma tu'u i luga i le satauro; o le upu lenei ua tusia, O IESU LE NASARETA, O LE TUPU O TAGATA IUTAIA.'

Manatu Autū: **O Iesu le Tupu**

Tatou fa'afetai ile Atua:--

- i. Ona ole ofoina mai o lona soifua pa'ia, e fai ma pagotā, a'o le Tupu, ina ia fa'asa'olotoina ai le lalolagi agasala.

- ii. Auā o lona finagalo onosa'i ile satauro ma le fa'alumaina, o le fa'aaliga lava lea o ia lava ole Tupu na afio mai e maliu mo i tatou uma.
- iii. Auā o ia lava o le Tupu agamalū ma le loto maulalo; o lana pule fo'i ma lona mālō, e fa'avavau lava lea.

Tatou fa'ato'ese ile Atua:--

- i. Auā ua tatou avea pea lesu Keriso e fai ma tupu ile upu, a ua lē atagia lea i la tatou amio.
- ii. Ona ua fia avea fo'i tatou e fai ma tupu i totonu o aiga ma nu'u, ae maise ai le Ekalesia a lesu, ua ta'ape'ape ai lana fanau o lo'o fia taumafai atu mo ia.
- iii. Ona ua leai se loto maulalo ma se alofa e maua i a tatou pulega ma fa'ai'uga, ma ua fevaevaea'i ai aiga, nu'u ma le Ekalesia.

Tatou tatalo ile Atua:--

- i. Ina ia fa'atumauiina lana pule fa'a-tupu i lenei lalolagi fenumia'i ma le fa'asausili, e maua ai le mapusaga o lana fanau uma.
- ii. Ina ia susulu mai lona malamalama io tatou loto uma, e tineia ai le fa'amauualuga ma le fa'asausili, e mulimuli atu ai i lana fa'asinomaga alofa mo lo tatou manuia.
- iii. Ina ia aumaia lona Agaga e galuea'iina ai loto o ta'ita'i o mālō uma o le lalolagi, ina ia pulea ma le tonu lana foafoaga.

APERILA

Aperila 01 - 07, 2018

Tusi Faitau: 1 Korinito 15:20-22

Matua: 1 Korinito 15: 20.... A o lenei ua toe fa'atuina mai Keriso i e ua oti, ua avea ma fa'apolopoloo e ua momoe.

Manatu Autū: **Ola fou iā Keriso**

Tatou fa'afetai ile Atua:--

- i. Ona o le ola fou ua foa'iina mai e ala i lona toe soifua manumālō mai le tu'ugamau, ua maufofi ai le tagata fa'atuatua i lona manuia fa'avavau.

- ii. Ona o le fou pea o lona alofa i aso uma, e ui ai ina tatou agasala pea, a ua ta'oto le fa'amoemoe ola mo i tatou ina ua salamō ma fa'atuatua ia te ia.
- iii. Auā ua folafolaina lana pule aoao ile tu'ugamau, ma ua fai lava lea ma 'oli'oli tele mo ona tagata fa'atuatua uma.

Tatou fa'ato'ese ile Atua:--

- i. Ona o lo tatou so'ona nonofo pea i le pogisā, e ui i lona manumālō ua alagaina, ua avea pea i tatou ma fanau fouvale ma le to'ilalo.
- ii. Auā ua fete'ena'i lo tatou molimauina atu o lona manumālō ile tu'ugamau, ma le olaga o lo'o tatou ola ai.
- iii. Ona ua tatou fa'atuana'i lona toe-tu mai le tu'ugamau, a ua fa'amuamua lo tatou poto e sa'ili ai o tatou lava vi'iga.

Tatou tatalo ile Atua:--

- i. Ina ia fa'amalosia e lona Agaga o tatou tagata solomuli-gofie, e fa'ailoa atu ma le agaga fa'atuatua ile lalolagi le manuia fa'avavau ua tatou maua e ala i lona fa'ato'ilaloina o le oti.
- ii. Ina ia foa'iina mai mo i tatou le alofa ua atoa e talia ai faigatā o lo tatou vala'auina, ma iloa ai le tāua o le avea ma molimau o ona lava puapuagā.
- iii. Ina ia fa'aolaina lona lalolagi uma e ala i lona Toe-tu, ma ia fausia lana pule filēmū i loto ma finagalo o ona tagata uma.

Aperila 8 - 14, 2018

Tusi Faitau: Eseta 8:1-2

Matua: Eseta 8:2... 'Ona to ese ai lea e le tupu o lana mama ua ia ave'eseina ia Hamanu, ma na tu'uina atu ai ia Moretekai. Ua tofia fo'i Moretekai e Eseta e pule i le fale o Hamanu.'

Manatu Autū: **Fa'aeaina i tofiga**

Tatou fa'afetai ile Atua:--

- i. Ona o le mea alofa o le fa'aeaina, na te foa'iina mai lava ile auauna ua onosa'i i puapuagā, ma ua avea ai lu'itau o le ola nei e fai ma ala ile manuia.

- ii. Auā o tofiga uma ua tatou maua, o lona vala’auina lava lea o i tatou uma lana fanau e galulue mo lona lava vi’iga.
- iii. Ona o le fa’atuputeleina pea o lona mālō ile lalolagi, e ala lea i le mafai ona sopo’ia atu o tuā’oi o talitonuga ma tapua’iga ese.

Tatou fa’ato’ese ile Atua:--

- i. Ina ua tatou lē iloa le tāua o lona vala’auina o i tatou i totonu o puapuagā, ma ua avea lea ma ala o lo tatou lē maua o ona manuia.
- ii. Auā ua tatou fiafia i aso lelei ma le faigofie, ae sosola ese ma lalafi pe a o’o i aso e mamafa ai galuega.
- iii. Ina ua mamapo i tōfiga ua ala mai ai le fa’aeaina, ma tatou lē lagonaina ai le ‘ato’atoa o le ola vivi’i atu ia te ia le puna o manuia.

Tatou tatalo ile Atua:--

- i. Ina ia foa’iina tele mai le fa’atuatua moni e mafaia ai ona tatou tali atu i fa’afitauli o tofiga ua maua mai ia te ia, ina ia faia ai i tatou ma au’upega aogā mo lona vi’iga.
- ii. Ina ia fua mai a tatou galuega ua faia ma le onosa’i i fua e aogā mo aiga, nu’u ma lana Ekalesia.
- iii. Ina ia aumaia ai fa’atasi lana fanau uma ile sa’olotoga moni, ma fa’aeaina fa’atasi ai lana fanau fa’atuatua uma ile lalolagi e tusa ma lona finagalo.

Aperila 15 - 21, 2018

Tusi Faitau: Efeso 3:1-6

Matua: Efeso 3:6....‘Ia avea nu’u ese ma sulif fa’atasi ma tino e tasi, ma ia tofusia fa’atasi i lana sa folafola mai ona o Keriso Iesu ile tala lelei.’

Manatu Autū: **Ole Fa’aolataga mo tagata uma**

Tatou fa’afetai ile Atua:--

- i. Auā ua ia fa’a’ato’atoaina le fusia fa’atasi o lana fanau uma ile manuia ua foa’iina mai, o le fa’aolataga lava lea na ia saunia i lona Alo e to’atasi.

- ii. Auā ua ia vala'auina i tatou tagata agasala e fai ma auauna tausi mea, ua ta'uaogāina ai lo tatou ola mo ia.
- iii. Ina ua fa'aali mai pea e lona Agaga ia i tatou le uiga loloto o ana fuafuaga poto, ua le fa'apito ai lana fa'aolataga, a ua aofia ai tagata uma.

Tatou fa'ato'ese ile Atua:--

- i. Ina ua punitia pea lo tatou iloa manino atu o lona finagalo mo lona lalolagi ona ole manatu fa'apito.
- ii. Ina ua tatou fa'a'ole'ole ile fa'asalalaluina atu o lana fa'aolataga i tagata uma, ua atili ai ona tupu le feitaga'i ma le fefulituaa'i.
- iii. Ona ua tatou lē fa'amaoni ile faiva tausi-mea ua vala'auina ai i tatou e le Matai, ma ua fa'alumaina ai lana galuega ona o lo tatou fa'atamala.

Tatou tatalo ile Atua:--

- i. Ina ia faia pea lona finagalo mo lona lalolagi e ala atu ia i tatou ana auauna fa'atauva'a, ma ia tupu tele le loto matala e iloa ai mea lilo o lo'o ia fa'aalia mai.
- ii. Ina ia fa'apa'iaina lo tatou ola e ala i lona māfuta mai, ma ia tupu ai le mautinoa o le fa'amoemoe ua ia fa'ata'oto mo i tatou lana fanau fa'atuatua.
- iii. Ina ia avefa pea lana Tala Lelei e fai ma mālosi e aumaia fa'atasi lana fanau i lalo o lana ta'ita'iga, ma ia tofufusia ai tagata uma i fa'alumaga felanua'i o lona mālō.

Aperila 22 - 28, 2018

Tusi Faitau: lona 4:9-11

Matua: lona 4:11....'O a'u fo'i oute lē alofa ea i Nineva le a'ai tele, o lo'o iai tagata e sili ona fo'atele i le selau afe ma afe e lua fulu, o e le iloa o latou lima taumatau po'o latou lima tauagavale, ma manu vaefa fo'i e tele.'

Manatu Autū: **E pule le Atua i ana mea na fai**

Tatou fa'afetai ile Atua:--

- i. Ona o lona alofa e tu'uavanoa ai i lana fanau ua ta'ita'iina e o latou lava loto, ma ua fa'aalia ai lona mana i lo latou vaivai.
- ii. Ona o le fa'amaoni o lona alofa mo lona lalolagi uma na ia foafoaina, ua leai ai se avanoa mo le manatu fa'apito ma le fa'ailoga tagata.
- iii. Ona o lona alofa fa'amagalo mo ona tagata uma o ē ua sesē ala ua latou filifilia, ma aga'i atu ai lo latou ola ile malaia.

Tatou fa'ato'ese ile Atua:--

- i. Auā o lo'o avea pea i tatou ma lona manatu fa'apito i lo tatou va, ma i'u ai ina tatou lē maua avanoa e auauna ai ia te ia.
- ii. Auā ua fai i tatou ma fa'amasino o lana fanau ile lalolagi, ma ua faigatā ai ona tatou a'apa atu mo lo latou lavea'iina.
- iii. Ina ua lē mafai ona pulea le ita i o tatou loto pe ā o'o ina lē tusa lona fa'aali mai ma le mea o lo'o naunau iai o tatou loto.

Tatou tatalo ile Atua:--

- i. Ina ia pulea e lona agaga o tatou loto i lona malamalama, ma ia iloatino ai lona finagalo alofa mo lona lalolagi uma.
- ii. Ina ia filifilia pea i tatou e avea ma ana avefe'au, mo le fa'asalalauina lea o lana fa'aolataga ile lalolagi uma.
- iii. Ina ia tineia le faitaga'i, a ia fausia le fealofani ma le galulue fa'atasi mo le manuia lautele o tagata uma uma.

Aperila 29 - Me 05, 2018

Tusi Faitau: Kolose 3:12-14

Matua: Kolose 3:14.... O lenei, ia o'ofu outou i le alofa mutimuti vale, ma le agalelei, ma le loto maualalo, ma le agamalū, ma le onosa'i, fa'apei o ē ua filifilia e le Atua, o ē ua paia ma ua alofaina.

Manatu Autū: **Ia ola ile Tala Lelei**

Tatou fa'afetai ile Atua:--

- i. Ina ua tu'uina mai e Keriso le fa'ata'ita'iga mo i tatou lana fanau taumafai, ua malamalama lelei ai o tatou loto ma mafaufau i le ala e ola ai.
- ii. Ona o lo'o a'oa'o mai pea i tatou uma e lona Agaga ile ola fa'apa'iaina, ia tusa lea ma le amio a i latou ua ia filifilia.
- iii. Ina ua ofoina mai Keriso e fai ma Alofa Tunoa e totonugalēmū iai lo tatou ola fa'atuatua, ma fuata mai ai le alofa i o tatou olaga.

Tatou fa'ato'ese ile Atua:--

- i. Ona ua tatou o'ofu i uiga leaga o le lalolagi, ae lafoa'i le alofa mutimutivale ma le agalelei, ua leai ai ni fua lelei o la tatou galuega molimau.
- ii. Ina ua avea pea i tatou ma fanau o le tau'i ma sui ma le fa'amau'aluga, ona ua vaivai lo tatou faitau i ana Afioga ma fa'atuatua iai.
- iii. Auā ua tatou fa'atuatua'ni o tatou tiute mo le fa'asalalauina atu o le Tala Lelei o le Alofa, a ua pupū o tatou loto ile tala'i atu o i tatou lava.

Tatou tatalo ile Atua:--

- i. Ina ia fa'a'ofuina pea i tatou i ofu o le agaga, e fai ai i tatou ma malamalama ile lalolagi.
- ii. Ina ia ta'ita'iina lo tatou ola galulue mo ia e lona lava Agaga Pa'ia, e fausia ai so'otaga mausalī mo ona tagata fa'atuatua uma.
- iii. Ina ia avea i tatou ma tino e tasi e ala i lo tatou molimauina atu o lana Tala Lelei ile lalolagi uma, e mau'aluga ai lona vi'iga i lo tatou ola auauna.

ME

Me 06 – 12, 2018

Tusi Faitau: 1 Samuelu 2:1-3

Matua: 1 Samuelu 2:1....Ua tatalo fo'i Hana, ua fa'apea, Ua oli'oli lava lo'u loto i le Ali'i; ua fa'amau'alugaina lo'u nifo e le Ali'i; ua ou mautali ai i e ita mai, aua oute fiafia i le olataga mai ia te oe.'

Manatu Autū: **Tinā māfuta ile Atua**

Tatou fa'afetai ile Atua:--

- i. Auā ua va'aia i fa'aaliga le tāua o le soifua tatalo i foliga o tinā fa'atuatua ia te ia, ma ua fai lea ma lu'itau aogā mo le ola o tinā uma.
- ii. Ona o le olaga fiafia ua ia foa'iina mai i tinā o lo'o latou iloa atu lona mamalu, ma avea ai lo latou ola tatalo e fai ma mea alofa sili e ala mai ai manuia.
- iii. Ona o le onosa'i ua ia foa'iina mai pea i tinā, e tauivi ai ma fa'aosoosoga tetele e ono fa'avavaia ai lo latou ola fa'atuatua, ma i'u atu ai ile 'oli'oli o le manumālō.

Tatou fa'ato'ese ile Atua:--

- i. Ona o lo tatou manatu fa'atauva'a i o tatou tinā i lo latou soifua māfuta atu ile Atua, ua auala mai ai manuia mo aiga, nu'u, mālō ma lana Ekalesia.
- ii. Auā ua leai se lagolago malosi a tamā ma fanau mo tinā, ma ua fa'avaivaia ai nisi tinā i o latou tiute ma faiva na vala'auina ai.
- iii. Ona ua vāivāi le ola tatalo o tinā, ina ua ave le fa'amuamua i mea sesē o le olaga nei, ma i'u ina solomuli ese atu ai mai le mafutaga ma le Atua na vala'auina i latou.

Tatou tatalo ile Atua:--

- i. Ina ia fa'atupuina le fiafia e tatalo ai i loto o tinā uma ole lalolagi, e aumaia ai mea alofa sili ma fusia ai lana fanau uma ile 'oli'oli fa'avavau.
- ii. Ina ia lē aunoa o tatou tinā ma lona Agaga Paia, e una'iina lo latou soifua galue ina ia fua mai ai talosaga o lo'o faia pea.
- iii. Ina ia maua e o tatou tinā uma le mālosi e tete'e atu ai ile fili o lo'o taufa'aleaga mai, ma ia maua le onosa'i e i'u atu ai ile manumālō.

Me 13-19, 2018

Tusi Faitau: Luka 4:16-20

Matua: Luka 4:18....'Ua i o'u luga le Agaga o le Ali'i, auā ua na fa'au'u mai ia te a'u e folafola le tala lelei i ē matitiva; ua auina mai a'u e ia e fa'amālōlō i ē loto moomo, e tala'i le sa'olotoga i

le tafeaga, ma ia pupula mata o ē tauaso, e tu'u sa'oloto i ē ua fa'asauāina, e tala'i le tausaga e finagalo malie mai ai le Ali'i.'

Manatu Autū: 'Fa'au'uina e le Agaga'

Tatou fa'afetai atu ile Atua:--

- i. Ona o lona Agaga Paia sa folafolaina e fai ma fesoasoani mo i tatou ana auauna vaivai, ua tupu ai le malosi e folafola atu lana Tala Lelei.
- ii. Ona o le Agaga Paia ua fa'au'uina ai i tatou tagata fa'atauva'a e fa'afegai ma lona mamalu e ala i lana galuega, ma fa'apa'iaina ai i tatou mo ana fe'au.
- iii. Ona o lona alofa tunoa tele ia i tatou ana auauna, ua foa'iina mai ai lona Agaga Paia, ua fua mai ai galuega ua faia i fuata ua ia fiafia iai.

Tatou fa'ato'ese ile Atua:--

- i. Ona ua lē moni lo tatou fa'alagolago atu ile galuega mana a lona Agaga Paia, a ua tatou fa'alagolago pea i lo tatou lava poto ma le iloa.
- ii. Ina ua lē atagia le galuega fa'aola a lo tatou Ali'i i lo tatou vala'aina, ma ua aunoa pea i tatou ma se fa'alagolago atu moni i lona Agaga Paia.
- iii. Auā ua mafuli o tatou taimi e fa'amasino atu ai i isi tala'iga ma tagata, a ua tatou le punonou ifo ma le fa'amaoni e fa'atino le galuega na fa'au'uina ai i tatou i lona Agaga.

Tatou tatalo ile Atua:--

- i. Ina ia ave'a pea lona Agaga Paia ma ta'ita'i-tama i lo tatou ola auauna, e manuia ai o tatou faiva ma maua ai agaga mo lona mālō.
- ii. Ina ia fa'alototele mai pea lona Agaga Paia mo i tatou lana fanau galulue, ia ave'esea fo'i le loto vaivai pe ā o'o ina mamafa lu'itau ole galuega.
- iii. Ina ia aumaia pea e lona Agaga le loto maulalo e usita'i atu ai i lona fa'aali mai, ma ia lē faia ai le galuega i le poto o le tagata, a'o lona lava finagalo.

Me 20-26, 2018

Tusi Faitau: Mika 7:7-9

Matua: Mika 7:7...A'o a'u, ou te fa'atalitali i le Ali'i, ou te fa'amoemoe i le Atua o lo'u olataga; e fa'afofoga mai lo'u Atua ia te a'u.

Manatu Autū: **E fa'amaoni le Alofa o le Atua**

Tatou fa'afetai ile Atua:--

- i. Ona o le fa'amaoni o lona alofa mo i tatou lana fanau agasala, ua tatou maua fua ai lana fa'aolataga e ui i lo tatou to'ilalo so'o.
- ii. Ona o lana mea alofa o le onosa'i e fa'atalitali ai i lona fa'aali mai, ma i'u atu ai ile manuia tele mai ia te ia.
- iii. Auā o lo'o ia fa'afofogaina mai le alaga a le tagata agasala, ma ofoina mai le fa'amoemoe e ufitia i tatou i lona malamalama.

Tatou fa'ato'ese ile Atua:--

- i. Ona o lo tatou televave ma fiafia e lafoa'i atu o tatou ola ile ti'apolo ma ana fa'aosoosoga, ma ua tatou le maua ai manuia sautualasi o lo'o ia ofoina mai.
- ii. Ina o lo tatou lē fa'atuatua ia te ia lo tatou puluvaga, ma tu'uina atu ai o tatou tagata to'ilalo i ona a'ao agalelei mo lo tatou lavea'iina.
- iii. Ona o lo tatou fa'atalitali i mea o lo'o tatou manana'o iai, ae lafoa'i le fa'aali mai o le Atua i ala matagofie ma le mamalu.

Tatou tatalo ile Atua:--

- i. Ina ia foa'iina mai mo i tatou le mālosi ato'atoa e olaina ai le fa'amoemoe ua ia tu'uina mai e ala ia Keriso Iesu, e avea ai le ola auauna ma mea fiafia.
- ii. Ina ia avea i tatou ma mea faigaluega e sili ona aogā mo lona vi'iga, ma ia talia mai lo tatou fa'atauva'a e ala i lona lava alofa tunoa.
- iii. Ina ia foa'iina mai mo i tatou le loto salamō ma le fa'atuatua fa'amaoni, e fa'atalitali atu ai ma le onosa'i i fa'asinomaga o le manuia ua ia finagalo iai.

IUNI

Me 27 - Iuni 02, 2018

Tusi Faitau: Fa'aaliga 3:20-22

Matua: Fa'aaliga 3:20....'Fa'auta, ou te tu atu i le puipui ma tu'itu'i atu; ai se tasi e fa'alogo mai i lo'u leo, ma tatala mai le puipui, out e ulufale atu ia te ia, ma te talisua fo'i ma ia, o ia fo'i ma a'u.

Manatu Autū: **O le Atua sa'ili mai**

Tatou fa'afetai atu ile Atua:--

- i. Ona o lona soifua sa'ili mai pea mo i tatou tagata agasala, ina ia fusia pea i tatou ile mafutaga ma ia e le aunoa.
- ii. Ona o lona Agaga Paia o lo'o fafaguina pea lo tatou fa'atamala, e tatalaina atu o tatou loto ia te ia lo tatou Ali'i alofa.
- iii. Auā o ia lava ua māgalo ai a tatou amioleaga uma, ma ua ofoina mai ai le avanoa e nonofo ai ma ia i lona manumālō fa'avavau.

Tatou fa'ato'ese ile Atua:--

- i. Auā ua fai i tatou ma fa'alāvea-a'ao, ile taumafai atu o lana fanau mo ona manuia ua ofoina mai, e ala i a tatou amio ma le tautala.
- ii. Ona ua tatou manatu ifo i lo tatou mālosi ma le poto ua lava lea, ma ua fa'atuana'i ai le fa'alogo atu i lona fetalai mai e ala ile faitau pea i lana Tusi Paia.
- iii. Ona ua tatou loto ma'a'a pea ma te'ena ai le galuega mana a lona Agaga Paia, o lo'o tu'umumusu mai i mea tatou te manuia ai.

Tatou tatalo ile Atua:--

- i. Ina ia a'oa'o mai lona Agaga mo i tatou lana fanau, e sa'ili atu ia te ia ma le loto fa'atuatua moni, ma tatalaina atu faitoto'a o ō tatou loto mo lona ulufale mai.
- ii. Ina ia faia pea lona finagalo i o tatou loto, na te pulea ai i tatou uma i lana pule amiotonu.
- iii. Ina ia aveia i tatou ma fanau o lona manumālō, ma tatou mautofiga ai fa'atasi ma ia i lona mālō tumau.

luni 03 - 09, 2018

Tusi Faitau: Tanielu 6:18-24

Matua: Tanielu 6:23....Ona fiafia tele lea o le tupu ona o ia, ua ia fetalai atu ia aveina a'e Tanielu ai le lua; ona aveina a'e ai lea o Tanielu ai le lua, ua lē afaina lava o ia, auā na ia fa'atuatua i lona Atua.'

Manatu Autū: **Oli'oli ile Manumālō**

Tatou fa'afetai ile Atua:--

- i. Auā ua molimauina pea lona alofa i taimi e si'omia ai tatou i puapuagā, ma ua fai lea ma ituaso tatou lagonaina ai lona latalata mai.
- ii. Auā o lo'o mafuta mai, ua tatou malolosi ai e tau'ave puapuagā o lo tatou vala'auina, ma ua tatou maua ai fa'amanuiaga o le 'oli'oli.
- iii. Ona o le manumālō ua aumaia e lona alofa tunoa mo i tatou ua sauni e feagai ma faigatā o le ola nei, ma ua ta'uamitonuina ai i tatou e ala ile fa'atuatua mausalī.

Tatou fa'ato'ese ile Atua:--

- i. Auā ua avea pea i tatou ma ala o le fa'alumaina o lona manumālō, e ala i lo tatou solomuli-gofie pe ā fetaia'i ma lu'itau mamafa o le ola auauna.
- ii. Ona o le ola fa'afoliga ile molimauia o lona finagalo alofa mo tagata uma, ma ua fa'avaivaia ai le ola auauna o isi tagata.
- iii. Ona o lo tatou fa'alagolago pea i lo tatou malosi ma le poto e tauivi ai, ae lafoa'i le ola fa'atuatua i lona mana e mafaia ai mea uma e fetaia'i ma i tatou.

Tatou tatalo ile Atua:--

- i. Ina ia foa'iina mai pea mo i tatou le fa'atuatua e onosa'i ai i faigatā e o'o mai, ma i'u atu ai lo tatou onosa'i i lona 'oli'oli fa'avavau.
- ii. Ina ia avea lo tatou mativa ile fa'atuatua ma ala o lona fa'aali mai pea mo i tatou, ae lē o ala o lo tatou fa'alumaina ma le tu'ulafoa'iina.
- iii. Ina ia tupu lauolaola pea lana Tala Lelei, e ala i lona fa'aaogaina o i tatou e fai ma ana mea faigaluega i tofiga ese'ese ua vala'auina ai i tatou.

luni 10 - 16, 2018

Tusi Faitau: Mataio 2:19-23

Matua: Mataio 2:21....‘Ona tula’i ai lea o ia, ua ave le tama ititi ma lona tinā, ona o ai lea i le nu’u o Isaraelu.’

Manatu Autū: **Usita’i ma mulimuli**

Tatou fa’afetai ile Atua:--

- i. Ona o lona finagalo alofa ua fa’aaogaina ai o tatou tamā e fai ma auala o ana vāvega ile lalolagi mo tagata uma.
- ii. Ona ole fa’atuatua ma le fa’amaoni o tamā i totonu o aiga, e ala ile ave ma tali pupuni mo le saogalēmū o tinā ma fanau mai faigatā e lamatia ai.
- iii. Ona ole fa’atuatua o tamā, ua fa’aalia lea ile onosa’i i le taufa’amata’u mai o le lalolagi, ae tumau ma tali atu ma le loto fiafia i lona vala’au mai.

Tatou fa’ato’ese ile Atua:--

- i. Ona o lo tatou manatu māmā pea ile tāua o tamā na foafoaina ai e lo tatou Atua, e ala i o latou tiute ua vala’auina ai i totonu o aiga, nu’u, mālō ma le ekalesia.
- ii. Ona o le tapunia pea o la tatou fa’alogo i o tatou tamā, ma ua tatou le maua ai ta’ita’iga aogā e lagolago ile fausia o mea lelei ma le mautū.
- iii. Ona ua le maua e tamā o ona po nei le fa’atuatua na molimauina i aso ua mavae, ile soifua o tamā ua ta’o’oto mai malae, ma ua leai ai ni vavega e va’aia i ona po nei.

Tatou tatalo atu ile Atua:--

- i. Ina ia tatalaina mai e lona Agaga la tatou fa’alogo, ina ia manino ai lona finagalo alofa o lo’o auala mai i o tatou tamā
- ii. Ina ia maua e tamā uma o aso nei le fa’atuatua e tutupu ai mea sili ma le ofoofogia, e fai lea ma molimau ola o lo latou vala’uina.
- iii. Ina ia mafutaina pea o tatou tamā e lona Agaga Paia, latou te mafaia ai o latou faiva o lo’o galulue ai.

luni 17 – 23, 2018

Tusi Faitau: Filipi 2:14-18

Matua: Filipi 2:14... 'Ia faia mea uma ma le lē muimui, ma le lē feʻinaua'i.'

Manatu Autū: **Ola ile filēmū o Keriso**

Tatou fa'afetai ile Atua:--

- i. Ona o lona aumaia lea o le malamalama moni ile lalolagi feʻfulituaa'i, o lona soifua lava lea ua avea ma fa'ata'ita'iga sili mo lo tatou ola, ina ia fealofani ai lana fanau uma.
- ii. Auā ua ia fa'aali mai le filemu moni e tau atu ile manumālō ua ia finagalo iai, ma ufiufi ai lo tatou 'ele'elea i ona luma atoa ma luma o tagata.
- iii. Ona o lana Tusi Pa'ia, ua fai lava lea ma ta'iala o lo tatou ola 'auauna, ma tatou momo'e ai ma le punoua'i e foa'iina atu lo tatou ola, e fai ma taulaga mo lona vi'iga.

Tatou fa'ato'ese ile Atua:--

- i. Ona o lo tatou lē fa'amaoni e alofa atu e pei ona ia alofa mai, ua fete'ena'i ai lona soifua pa'ia ma lo tatou molimau atu.
- ii. Auā ua avea pea i tatou ma fa'atupu vevesi i totonu o lana Ekalesia, aiga ma nu'u e ala i lo tatou fa'amauaaluluga i la tatou gagana ma le amio.
- iii. Auā ua tatou folafola atu le filēmū o Keriso i tagata, a ua tausolomua i tatou ile muimui ma le manatu fa'apito.

Tatou tatalo ile Atua:--

- i. Ina ia liligiina mai pea lona Agaga Pa'ia mo i tatou uma lava, e tineia ai le faitaga'i ma le feʻfulituaa'i.
- ii. Ina ia a'oa'oina i tatou e lona Agaga Pa'ia ile poto ato'atoa o Keriso, e galulue fa'atasi ai ma le fealofani ile loto ma le mafaufau e tasi.
- iii. Ina ia tala'aiina pea le alofa mutimutivale o Keriso i galuega ua tatou galulue ai, ma fusia ai i tatou uma lana fanau i lona filēmū moni.

luni 24 – 30, 2018

Tusi Faitau: Iosua 24:14-16

Matua: Iosua 24:16....'Ona tali mai ai lea o le nu'u, ua fa'apea mai, la mamao lava ia te i matou ona matou tu'ua o le Ali'i, ina ia auauna i atua 'ese.

Manatu Autū: **Alofa i lau filifiliga**

Tatou fa'afetai ile Atua:--

- i. Ona o le sa'olotoga ua foa'iina mai e filifili tonu ai mo le manuia, ma molimauina ai le fa'amaoni o lona alofa tunoa mo i tatou lana fanau galulue.
- ii. Ona o lana pule filemu ma le amitonu, o lo'o ta'it'iina ai a tatou faiga-filifiliga, ina ia manuia ai fo'i ma isi tagata o lo'o fia maua ona tamaoaiga.
- iii. Ona o lo'o avea pea lona mana e fai ma mālosi e lafoa'i ai tupua 'ese, ae ofoina atu atoa lo tatou alofa mo ia e ala i la tatou tautua.

Tatou fa'ato'ese ile Atua:--

- i. Ona o lo tatou filifilia pea o tupua mamate e auauna iai, e pei o tamao'aiga o le ola nei, ma ua pogai ai le i'uvale o a tatou sa'iliga.
- ii. Auā ua lē i'u atu i sona vi'iga a tatou filifiliga, ma ua tupu atili ai lo tatou fa'alumaina i amioga matagā o lo'o tatou faia pea.
- iii. Ona o lo tatou filifili ia te ia i a tatou folafolaga, a ua mamao tatou ma se alofa ia te ia, o lē na ulua'i filifilia i tatou.

Tatou tatalo ile Atua:--

- i. Ina ia liligi tele mai lona poto e fa'atumulia ai lo tatou gaogao, ma ia filifili tonu i tatou i manuia mo tagata uma ae le na'o i tatou lava.
- ii. Ina ia fa'a-tagatamatua e lona Agaga lo tatou tama-meamea ile fa'atuatua, e i'u atu ai a tatou filifiliga uma i lona lava vi'iga, ae lē ona o so tatou ta'uuleleia.
- iii. Ina ia fa'a'oloaina i tatou e lona lava Agaga Paia ile alofa ua 'ato'atoa, e fa'ataunu'uina ai a tatou filifiliga, ma alolofa moni ai ia te ia.

TATALO

*Ia outou finafinai i le tatalo
Ia mataala i lea mea ma le faafetai*

O la'u tatalo:

Le Alii e, ia e alofa mai ia te a'u le tagata agasala. Ia e foai mai le loto tele e suia ai mea ua tatau ona sui, ma le to'afilemu e talia ai mea e lē tatau ona suia, ma foa'i mai le atamai e iloa ai le eseese o ia mea. Ia oo mai lou malo, ma ia faia lou finagalo i le lalolagi e pei ona faia i le lagi. Amene!



E LATALATA LE ALII
I A I LATOU UMA
E VALAAU IA TE IA
O I LATOU UMA
O E VALAAU IA TE IA
MA LE FAAMAONI

IULAI

Iulai 1 - 7, 2018

Tusi Faitau: I Samuēlu 3: 11 – 14

Matua: I Samuēlu 3:14...O le mea lea ua ou tauto ai ile aiga o Eli, e le faamagaloina le pagota a le aiga o Eli i se taulaga po o se mea foa'i mai e fa'avavau lava.

Manatu Autū: **Finagalo le Atua ile fa'amaoni male Amiotonu**

Tatou fa'afetai ile Atua:-

- i. Ona o le le tuulafoaiina ma liliuese fofoga o le Atua ma o tatou tagata, ona o lotatou le faamaoni ma le femoumouai.
- ii. Ona o le tumau pea o lona alofa mo I tatou ma a tatou fanau, e ui lava ina tatou fiafia tatou te ola i le loloto o le agasala.
- iii. Ona o le onosai ma le faapalepale o le Atua o loo tatou maua ai pea le avanoa, tatou te salamo ai ma toe foi atu ia te Ia i le agaga ma le faamaoni.

Tatou fa'atoese ile Atua:-

- i. Ona o le tatou tu'inanau ma le matape'ape'a i mea e leai se aoga o le lalolagi.
- ii. Ona o le femoumouai ma le le tumau i se mea e tasi, o le tatou ola faatuatua.
- iii. Ona o lo tatou faamuamua pea o faamanuiaga faa-le-tino i lo o faamanuiaga faa-le-agaga

Tatou tatalo ile Atua:-

- i. Ina ia manino i le vaai a tagata uma, o le faamuamua o le Atua e manuia ai o tatou olaga.
- ii. Ina ia mafai ona tatou pulea o tatou loto ma ona tu'inanau, i mea e leai se aoga a le lalolagi e tupu ai le agasala.
- iii. Ina ia mafai ona tatou maua uma le malosi faale-agaga tatou te faia ai le faamaoni ma le amiotonu iaso uma o lo tatou ola.

Iulai 8 – 14, 2018

Tusi Faitau: Ioane 4: 13 – 15

Matua: Ioane 4: 14....A o se inu ile vai ou te avatu ia te ia, e le toe fia inu lava ia, a o le vai ou te avatu ia te ia, e avea i totonu ia te ia ole vaipuna.

Manatu Autū: **O Iesu le Punavai o le Ola**

Tatou faafetai ile Atua:-

- i. Ona o le tamaoaiga sasaa mai o le Atua, o loo tatou maooa ma malilie ai i aso uma.
- ii. Ona o la lava le punavai o le ola faal-eagaga o loo mafai ai ona tatou faatino ma atinae lana galuega.
- iii. Ona o le vaiola na tafe mai i le satauro ua tatou ola ai.

Tatou faatoese ile Atua:-

- i. Ona o lo tatou mata'ū e foai mo le Atua, e ui ina tatou malilie i le anoanoai o lana faasoa mo i tatou.
- ii. Ona ua tele ina tatou le amanaia le punavai e ola ai, a ua tatou saili i mea le aoga e oti ai.
- iii. Ona o le tele o taimi e fai i tatou ma pa pupuni, o le tafe atu o le vai o le ola i isi tagata.

Tatou tatalo ile Atua:-

- i. Ina ia fesoasoani mai pea le Atua ina ia avea pea le Ekalesia ma alavai o faamanuiaga, e maua ai e tagata uma le faolataga.
- ii. Ina ia tatou lagona uma le fiafia e fesootai atu i le Alii, e faatumulia ai i tatou i le vaipuna o le olataga.
- iii. Ina ia puna pea i o tatou loto ma agaga le vai o le ola, tatou te fiafia ai e foai ma ofoina atu mea uma e oo lava i lo tatou ola, mo le Atua ma lona finagalo.

Iulai 15 - 21, 2018

Tusi Faitau: Galuega 10: 4 – 6

Matua: Galuega 10: 4 – 6.... Ua fai mai o ia ia te ia, Ua o a'e au tatalo ma au mea alofa o fai ma fa'amanatuga i luma o le Atua.

Manatu Autū: **E manino i le Silafaga a le Atua Galuega uma tatou te faia.**

Tatou faafetai ile Atua:-

- i. Ona o le tautua matavela o lana fanau fa'atuatua i le atina'eina o lona finagalo, i totonu o Ekalesia, nuu faapea foi ma le atunuu.
- ii. Ona o le galuega mana a le Agaga Paia o lo'o faaosofia ai pea o tatou tagata i taimi uma, tatou te faia ai mea sili mo le Atua ma lona finagalo.
- iii. Ona o le tele pea o meaalofo a le Atua e tua i ai o tatou tagata, i le faatinoga o o tatou tofi ma tiute.

Tatou faatoese ile Atua:-

- i. Ona ua tatou limamau ma mata'ū e faasoia le tamaoaiga, ua foai mai e le Atua mo le manuia o isi ae maise lana feau ma le galuega.
- ii. Ona ua le manuia ma le lelei le tele o mea tatou te faia, ona o lo tatou matape'ape'a ma le manao lasi.
- iii. Ona ua sili lo tatou naunau e fai galuega lelei mo i tatou lava, i lo o le Atua ma lona finagalo paia.

Tatou tatalo ile Atua:-

- i. Ina ia maua e tagata uma i totonu o aiga o nuu ma Ekalesia, le agaga o le fai mea sili ma le fai mea lelei mo le manuia o isi, ma le viiga o le Atua.
- ii. Ina ia tutu ma galulue faatasi tagata uma ma le faalogologo tiga, e atinae le talalelei tatou te manuia ai.
- iii. Ina ia ave pea e o tatou tagata le faamuamua i le Atua ma lona finagalo, i aso uma e le aunoa.

Iulai 22 - 28, 2018

Tusi Faitau: Iakopo 4: 7 – 10

Matua: Iakopo 4:8.... Ia outou fa'alatalata atu i le Atua, ona fa'alatalata mai lea o la ia te outou. Tagata agasala e, ina fa'afano ia o outou lima, o outou e fa'alotolotolua e, ina fa'amama ia o outou loto.

Manatu Autū: **Faalatalata i le Atua ona fa'alatalata mai ai lea o la.**

Tatou faafetai ile Atua:-

- i. Ona o le tele o le alofa o le Atua, o loo tuu avanoa ai pea mo i tatou le fanau agasala.

- ii. Ona o loo nofo sauni pea le Atua e puipui ma taitai, ma avatu ia te i tatou i lona malo e faavavau.
- iii. Ona e tali mai pea lava le Atua i taimi uma, e faamaoni ai le tatou valaau ia te ia.

Tatou faatoese ile Atua:-

- i. Ona o le suamalie ma le matalasi o le lalolagi, ua tatou mumusu ai e faalatalata i le Atua.
- ii. Ona ua mamao tele lo tatou va ma le Alii, ona o le faamalie o o tatou loto ae tuu lona finagalo.
- iii. Ona ua avea i tatou ma a tatou amioga, e fai ma ala o le vava mamao o isi o tatou uso a tagata ma le Alii.

Tatou tatalo ile Atua:-

- i. Ina ia avea i tatou uma o ni tagata faamaoni i luma o le Atua, ona faamaoni mai ai foi lea o la ia te i tatou.
- ii. Ina ia tatou iloa moni ona salamo ma faamaualalo i ona luma, tatou te manuia ai.
- iii. Ina ia tatou maua uma le agaga o le mafuta faatasi ma le Atua, e maopopo ma manuia ai o tatou aiga, o nuu ma Ekalesia.

AOKUSO

lulai 29 – Aokuso 4, 2018

Tusi Faitau: loane 3: 16 – 18

Matua: loane 3: 16....Aua ua fa’apea lava ona alofa mai o le Atua ile lalolagi, ua ia auina mai ai lona Atalii e to’atasi, ina ia le fano se tasi e fa’atuatua ia te la, a ia maua e ia le ola e fa’avavau.

Manatu Autū: **la faaali atu i lo tatou ola le alofa moni faaleatua.**

Tatou faafetai ile Atua:-

- i. Ona o le alofa o le Atua e lautele ma loloto, e le faapito foi ma le faailoga tagata.
- ii. Ona e ui lava ina tatou agasala ma faagalo i lona alofa, ae tumau lava i o tatou luga e o’o i le faavavau.
- iii. Ona na te le’i taofia se mea e tasi e faatino ai le taunuuga o lona alofa mo i tatou, ina ia tatou maua ai le ola ma a tatou fanau, ma maua atili ai lava.

Tatou faatoese ile Atua:-

- i. Ona ua tatou tali tualimaina le alofa mai o le Atua.
- ii. Ona ua tatou faaaoga seseina le alofa mai o le Atua e sue ai a tatou mea ma o tatou mamalu ma viiga.
- iii. Ona ua tatou manatu tatou te maua fua faamanuiga a le Atua e ala i lona alofa, e aunoa ma lo tatou faia o lona finagalo paia.

Tatou tatalo ile Atua:-

- i. Ina ia uluulumatafolau le alofa moni faale-Atua i o tatou loto ma agaga.
- ii. Ina ia tupu lauolaola le faamaoni o le alofa, i totonu o o tatou aiga o nuu ma Ekalesia, e faatino ai o tatou faiva alofilima.
- iii. Ina ia tutusa tagata uma i lo tatou alofa, ae le na'o tagata e alolofa mai ma maua mai ai a tatou mea.

Aokuso 5 – 11, 2018

Tusi Faitau: Efeso 4: 25 – 29

Matua: Efeso 4: 27....Aua fo'i ne'i tu'uina atu e outou se mea e mautu ai le tiapolo.

Manatu Autū: **Aua ne'i tu'uina i le tiapolo se mea e nofo ai ia te oe.**

Tatou faafetai ile Atua:-

- i. Ona o le Atua o le tatou talita ma le maluapapa ma u fanafana a le alii o le lalolagi.
- ii. Ona o le mana o le Atua tatou te maua ai le malosi, tatou te manumalo ai i le fili.
- iii. Ona o le galuega a le Agaga Paia o loo mafai ai ona tatou teena le matalasi o faaosoosoga a le Tiapolo.

Tatou faatoese ile Atua:-

- i. Ona o le vaivai o lo tatou ola faatuatua, ua saofaga mai ai le alii o le lalolagi i o tatou olaga.
- ii. Ona o lo'o tatou tuu pea o le avanoa i le Tiapolo e nofo ai i o tatou loto.
- iii. Ona o le faafoliga o lo tatou ola tautua mo le Atua ma lona finagalo e ala i o tatou tofi ma tiute.

Tatou tatalo ile Atua:-

- i. Ina ia mausali ma maua'a lo tatou faatuatua ma lo tatou ola talitonu i le Atua, I taimi uma o lo tatou ola.
- ii. Ina ia faaaupagaina uma i tatou e le Atua i lona mana paia, ma tatou manumalo ai pea i le Tiapolo ma ana faaosoosoga.
- iii. Ina ia tumu pea i tatou i le tumu atoatoa o Keriso, tatou te le toilalo ai i se mea.

Aokuso 12 – 18, 2018

Tusi Faitau: I Peteru 4: 7 – 11

Matua: I Peteru 4: 10... la ta'ito'atasi ma auauna o le tasi i le tasi i lea lava mea, e pei ona maua e la o le mea alofa, e pei o auauna pule lelei a le alofa tunoa uiga eseese o le Atua.

Manatu Autū: **Faaoga meaalofa a le Atua e auauna ai mo isi.**

Tatou faafetai ile Atua:-

- i. Ona o le tele o meaalofa a le Atua ua faaoloina ai o tatou tagata, ina ia tatou faaaogaina ma le tatau.
- ii. Ona o lona faamanatu mai pea ma a'oa'o mai mo i tatou ala eseese, tatou te faaaogaina ai ana meaalofa.
- iii. Ona o meaalofa a le Atua e le uma, ae fau pea ma soloi i o tatou luga, e o'o lava i le faavavau.

Tatou faatoese ile Atua:-

- i. Ona ua tele ina tatou manatu o lo tatou lava poto ma le malosi faale-tagata, ua tatou maua ai meaalofa a le Atua.
- ii. Ona ua tatou manatu faapito ma tatou mumusu e faasoa atu meaalofa a le Atua ua tatou maua, mo le manuia o isi o tatou uso-a-tagata.
- iii. Ona ua tatou faaoga meaalofa a le Atua, e saili ai le oa ma le tamaoaiga ma mamalu ma viiga faa-le-lalolagi.

Tatou tatalo ile Atua:-

- i. Ina ia tatou maua uma le alofa o le Alii e faatino ai ana meaalofa, ua foai mai i o outou aao ma o matou lima.
- ii. Ina ia maualuga pea le viiga o le Atua i lo tatou faatinoina o ana meaalofa.

- iii. Ina ia tatou manatua i taimi uma, o mea uma ua ia i tatou o mea a le Atua, ae le ni a tatou mea.

Aokuso 19 – 25, 2018

Tusi Faitau: Eperu 11: 4 – 7

Matua: Eperu 11: 6...A leai fo'i se fa'atuatua e le mafai ona fialia mai o la, aua e tatau i le alu atu i le Atua ona talitonu o loo soifua o la, o la fo'i na te tauia mai o e matua saili ia te la.

Manatu Autū: **A leai se fa'atuatua e le mafai e se tasi ona fa'afiafiaina le Atua**

Tatou faafetai ile Atua:-

- i. Ona o ana afioga paia ua faaali manino mai ai mo i tatou, e leai ni faamanuiaga tatou te maua pe a tatou le faatuatua i le Atua.
- ii. Ona o le faatuatua faamaoni i le Atua e faatumulia ai i tatou i le faaeaina, e o'o lava i lona malo e faavavau.
- iii. Ona o le soifua faatuatua o o tatou tuua, ua tatou sapi ai nei i faamanuiaga o le Talalelei.

Tatou faatoese ile Atua:-

- i. Ona o le taumamao pea o lo tatou ola i aso uma, ma le finagalo paia o le Atua.
- ii. Ona o le vaivai o lo tatou ola faatuatua i le Alii, ona ua tatou faasili manuia faale-tino i o tatou olaga.
- iii. Ona ua tauaso o tatou mata faale-agaga i aoaoga ma faataitaiga lelei, na faia e o tatou tuua ona o le agasala ma ona tu'inanauga.

Tatou tatalo ile Atua:-

- i. Ina ia avea i tatou uma ma ni tagata e fialia mai i ai le finagalo o le Atua, i aso uma o lo tatou ola.
- ii. Ina ia fai i tatou uma ma faataitaiga sili o le ola faatuatua faamaoni i le Atua, i totonu o o tatou aiga, o nuu ma Ekalesia.
- iii. Ina ia avea lo outou soifua ma so matou ola faatuatua, e fai ma ala o faamanuiaga mo tagata uma, ma le viiga o le Atua.

SETEMA

Aokuso 26 – Setema 1, 2018

Tusi Faitau: II Korinito 3: 2 – 3

Matua: II Korinito 3: 2...O outou o la matou tusi, o tusia i o outou nei loto, ua iloa ua faitaulia e tagata uma.

Manatu Autū: **O oe ma lou soifua ole tusi mai i le Alii.**

Tatou faafetai ile Atua:-

- i. Ona o le Talalelei ua faatonu folau pea i lo outou soifua ma so matou ola.
- ii. Ona ole faaaogaina o o tatou tagata faatauva, e fai ma ipu ma vaa o le feau o le aaolataga, e ala i tofi ma tiute o lo'o tatou galulue ai.
- iii. Ona o le filifilia o i tatou e fai ma tusi e susulu atu ai le malamalama o Keriso, ia te i latou uma o i le pogisa.

Tatou faatoese ile Atua:-

- i. Ona ua le avea i tatou e fai ma tusi o le ola, a ua fai ma tusi o le malaia i le tele o taimi.
- ii. Ona o le tauaso pea o o tatou mata faale-agaga, ona o le agasala ma ona tu'inauga.
- iii. Ona ua le tusia i o tatou loto ma agaga le upu a le Atua, a ua gata lava i o tatou laugutu.

Tatou tatalo ile Atua:-

- i. Ina ia tusia matamata tetele i o tatou loto ma agaga le upu o le ola ma le Talalelei, i aso uma e le aunoa.
- ii. Ina ia avea i tatou uma o ni tusi faamaoni o le Talalelei, ma susulu atu ai le malamalama o Keriso, i totonu o o tatou aiga o nuu ma Ekalesia.
- iii. Ina ia atagia pea i le faatinoga o o tatou tofi ma tiute e le aunoa, le alofa ma le faamaoni o le Alii.

Setema 2 – 8, 2018

Tusi Faitau: Ioane 17: 15 – 19

Matua: Ioane 17: 18...Fa'apei ona e auina mai a'u ile lalolagi, ua fa'apea fo'i a'u ona auina atu o i latou ile lalolagi.

Manatu Autū: **Ua auina atu i tatou e Iesu.**

Tatou faafetai ile Atua:-

- i. Ona o le alofa le mavae o le Atua ua auina atu ai i tatou o tagata agasala male vaivai e fa'aailoa atu lona finagalo ile lalolagi.
- ii. Ona o le savali na auina mai e le Atua na sulugia ai Samoa, i ave malolosi o le tala o le faaolataga.
- iii. Ona o le faaaogaina o i tatou e le Atua e fai ma ave feau o lana Talalelei, o le faailoga lea o le amanaiaina o o tatou tagata faatauavaa ona o le agasala.

Tatou faatoese ile Atua:-

- i. Ona o lo tatou le faamaoni i lo tatou valaauina e pei ona auina atu ai i tatou, e ala i o tatou tofi ma tiute.
- ii. Ona o lo tatou taumamao pea ma le Atua ona o lo tatou paie ma le faapalapala.
- iii. Ona o lo tatou faataligatuli i le valaau mai o lesu, ua tatou le lagona ai le taua o lo tatou valaauina.

Tatou tatalo ile Atua:-

- i. Ina ia faapaiaina pea le Ekalesia Aoa, ma saga faatumauina le ave pea ma itutino malosi o le aiga o le Atua, e auina atu mo lana galuega paia.
- ii. Ina ia faamumuina pea e le Atua loto o le Ekalesia, ina ia mausali le faatuatua o ona tagata ia te la.
- iii. Mo le Kolisi faafaifeau i Malua ina ia lava tapena le Aufaigaluega e auina atu mo lesu.

Setema 9 – 15, 2018

Tusi Faitau: I Samuelu 16: 6 -7

Matua: I Samuelu 16: 6...A ua fetalai mai le Alii ia Samuelu, Aua e te vaai i lona tino, po o le maualuga o lona tino, auā ua ou tete'e ia te ia; auā e le vaai le Alii pei ona vaai o tagata, auā e vaai tagata i le tino, ae vaai le Ali'i i le loto.”

Manatu Autū: **E le Silasila le Atua e pei ole va'ai a le tagata.**

Tatou faafetai ile Atua:-

- i. Ona o le loloto o le alofa ma le agalelei o le Atua mo i tatou le tagata agasala.
- ii. Ona o le o'oo'o pea i taimi uma o le silafaga paia a le Atua, i o tatou loto ma agaga.

- iii. Ona ua le avea o tatou vaivaiga faale-tagata, e punitia ai lo tatou avanoa i le ola e faavavau.

Tatou faatoese ile Atua:-

- i. Ona ua tele ina avea o tatou vaivaiga faale-tagata, e faavae ai a tatou faaiuga fai.
- ii. Ona ua pa tuaoi lo tatou alofa ma le fai mea lelei, e le matagofie o le lalolagi ma ona tu'inanau.
- iii. Ona ua faapito le tatou vaai na'o tagata o aiga ma i latou e maua mai ai ni mea.

Tatou tatalo ile Atua:-

- i. Ina ia tutusa tagata uma i lo tatou alofa ma le fai mea lelei.
- ii. Ina ia avea i tatou ma faataitaiga sili o le silasila faale-Atua, i totonu o o tatou aiga ma nuu, o le malo ma le atunuu, faapea ma Ekalesia.
- iii. Ina ia aua nei tosina a tatou faaiuga fai, ona o le oa ma le tamaoauga ma mamalu, ma viiga o lenei lalolagi.

Setema 16 - 22, 2018

Tusi Faitau: I Tupu 19: 9 – 10

Matua: I Tupu 19:10...Ona fai atu lea o ia, ua ou matua maelega a'u ona o le Alii le Atua o au, aua ua tuua e le fanauga a Isaraelu lau feagaiga, ua latou soloia i lalo ou fata faitaulaga, ua fasiotia foi e i latou au perofeta ile pelu, ua toe na o a'u lava, ua latou fia fasioti foi ia te a'u.

Manatu Autū: **Afai e au ma i tatou le Atua,
o ai se fa'asaga tau mai?**

Tatou faafetai ile Atua:-

- i. Ona o le ola faalaeiau mai o le Agaga Paia o loo fai ma malosiaga e mafai ai e le Ekalesia, ona atiae lana galuega e ala i le soifua tautua o ona tagata lotu.
- ii. Ona o le pa'i mai pea o le Atua i taimi uma tatou te lagonaina ai le vaivai ma le le mautonu.
- iii. Ona o le malosi faaaogaina o le Ekalesia aua le Talalelei ma ona tagata.

Tatou faoese ile Atua:-

- i. Ona o lo tatou palaaai gofie pe a oo ina lugaluga le tai i le folauga a le au Kerisiano.

- ii. Ona e tele taimi e galo ai ia te i tatou o loo soifua le Taitai Sili, na te tauina le taua faale-agaga mo i tatou.
- iii. Ona o lo tatou fa'alogologo tiga, ma tele ai ina tatou faia ma le tomumu ma le muimui feau o le Talalelei.

Tatou tatalo ile Atua:-

- i. A'o agai mai le mamafa o galuega o lenei tausaga, tatou tatalo ina ia pipii mai pea A'ao alofa o le Atua, na te taitaiina le tatou faigamalaga.
- ii. Ina ia faaoloina i tatou e le Atua i le lototele ma le atamai, tatou te feagai ai ma fita o le ala.
- iii. Ina ia faamanuia mai le Atua i le soifua galulue o tagata uma ma le Ekalesia.

Setema 23 – 29, 2018

Tusi Faitau: Iakopo 1: 19 – 21

Matua: Iakopo 1: 19....O lenei, o'u uso pele, ia ta'itasi le tagata ma fa'atalise ona fa'alogologo, ia fa'agasegase ona tautala atu, ia fa'agesegese ona ita.

Manatu Autū: **Faifai malie ou faiva.**

Tatou faafetai ile Atua:-

- i. Ona o le mana o le Agaga o loo avea ma faamalosi'au e faatoafilemuina i tatou, i taimi e lolofi mai ai faafitauli o le olaga.
- ii. Ona o le fesoasoani mai o le Atua ua mafai ai ona tatou tali atu, i taimi e osofa'ia ai i tatou e le Tiapolo.
- iii. Ona o le tele o le alofa o le Atua, ua faatelegese ai pea lona to'asa mo i tatou tagata agasala.

Tatou faatoese ile Atua:-

- i. Ona o le vave o lo tatou ita ma le fia tauimasui i tagata, e aunoa ma lo tatou faalologo i le Agaga o le Atua.
- ii. Ona o le tele vave o a tatou faaiuga fai, ua afaina ai le soifua auauna o isi o tatou uso a tagata.
- iii. Ona ua tatou le maua le loto faamagalalo e pei ona aoao ma faataitai mai e lesu.

Tatou tatalo ile Atua:-

- i. Ina ia tatou maua uma le filemu o le Atua, pe a lafotuina i tatou i faigata o le olaga.

- ii. Ina ia aoaoina i tatou ia iloa ona faautauta lelei ma faalogo i le Agaga o le Atua, e manuia ai o tatou faiva ma tiute.
- iii. Ina ia mafai e le Ekalesia ona tausii pea le filemu ma le nofo lelei o o tatou tagata, i lenei vaitau o iuleo eseese ma faitioga.

OKETOPA

Setema 30 – Oketopa 6, 2018

Tusi Faitau: Salamo 127: 1 – 2

Matua: Salamo 127:1...Afai e le Atiina a'e e le Alii le fale, e galulue fua i latou o e atiina a'e, afai e le leoleo e le Alii le a'ai, e mataala fua o le na te leoleoina.

Manatu Autū: **Atia'e fa'atasi ma le Atua**

Tatou faafetai ile Atua:-

- i. Ona o loo tupu pea le Ekalesia ma le soifua auauna o o tatou tagata, i le faatasi mai o le Atua.
- ii. Ona o le foai mai pea mo i tatou uma taitoatasi o le malosi faafouina ma le atamai, e faataunuu ai la tatou tautua ma le auaunaga.
- iii. Ona o le agaga o loo faaosofia ai le Ekalesia ma i tatou uma e fai mea sili, mo le galuega a le Alii.

Tatou faatoese ile Atua:-

- i. Ona o le tatou le fiafia e atiae faatasi ma le Alii, o Le e ana le malosi tatou te mafaia ai soo se mea.
- ii. Ona ua tele ina tatou faamoemoe ma faalagolago i lo tatou poto ma le malosi faale-tagata, e faatino ai a tatou feau ma galuega.
- iii. Ona ua tatou faalavelave i le soifua atiae ma le fia fai mea lelei o isi tagata i le Atua, e ala i a tatou amioga faaalua.

Tatou tatalo ile Atua:-

- i. Ina ia tatou fiafia uma e atiae le Talalelei ma le mautinoa, e ui ina tatou vaivai ma lē atoatoa, ae o loo 'au le Atua ma i tatou.

- ii. Ina ia maua e le Ekalesia Aoao ma tagata uma le mana o le Agaga Paia, tatou te galueaina ai ma atiae lona malo.
- iii. Manatua i le tatou tatalo aulotu uma, o loo feagai ma galuega tetele i lenei vaitau, aua le atinaeina o le Talalelei.

Oketopa 7 – 13, 2018

Tusi Faitau: Efeso 6: 1 -4

Matua: Efeso 6:1....O outou le fanau, ia outou fa’alogo i o outou matua i le Alii, aua o le mea tonu lava lea.

Manatu Autū: **E manuia fanau usita’i.**

Tatou faafetai ile Atua:-

- i. Ona o le meaalofa paia a le Atua ua avea pea ma faamanuiaga mo matua ma aiga, ma nuu ma le atunuu.
- ii. Ona o le taiala ua faasino mai e le Atua e aoao ai fanau, o le faailoga o lo latou taua i lona finagalo.
- iii. Ona o galuega eseese a le Ekalesia, o loo faafaileleina ai le soifua tuputupu a’e o fanau.

Tatou faatoese ile Atua:-

- i. Pe afai ua le faalogo le fanau i matua ae ua apogofie mea fou, ona o le televave o suiga ua i ai nei aso.
- ii. Ona o amioga le taupulea ua mafuli i ai le toatele o fanau, ma ua le fia mafuta ai i matua.
- iii. Pe afai ua faatamala matua i lo tatou tiute mai le Atua, o le tausia lelei lea ma aoao fanau i lona finagalo paia.

Tatou tatalo ile Atua:-

- i. Ina ia iloa e fanau lo latou taua, ia iloa ona ava i matua, ae sili ai ona iloa ona matata’u i le Atua.
- ii. Ina ia avea a tatou fanau e fai ma faataitaiga lelei i isi fanau a le atunuu, i le amio pulea ma le ola ususita’i.
- iii. Tatalo mo fanau uma ua o ese mai ma matua ona o faiga a le fili, ina ia tausia pea e aao alofa o le Atua, ma lagona le toe atamai, ma toe foi mai i aiga.

Oketopa 14 – 20, 2018

Tusi Faitau: Mareko 6: 30 – 32

Matua: Mareko 6:31....Ona fetalai atu lea o la ia te i latou, “Ina o mai ia, tau lava o i tatou, i se mea tu’ufua, se’i tou mapu a’e teisi.” Aua e to’atele e na feoa’i ai, ua le mafai ai i latou ona a’ai.

Manatu Autū: **Tatou mapu ane teisi fa’atasi ma Alii.**

Tatou faafetai ile Atua:-

- i. Ona o avanoa taua ua maua, e mafai ai ona tatou toe tepa i tua, ma toe afua se taeao fou aua a tatou feau ma galuega mo le Atua.
- ii. Ona o le soifua faaaogaina o le Ekalesia ma o tatou tagata mo le Talalelei ma le faaolataga.
- iii. Ona o le faasiliga malosi o loo foaiina mo le tagata, e faatupu ai pea le fiafia e auauna mo le Atua ma lona finagalo.

Tatou faatoese ile Atua:-

- i. Ona o le tele o o tatou taimi ma le malosi ua alu valea i mea le aoga.
- ii. Ona o le manumalo o o tatou vaivaiga faale-tagata, ua tatou le fiafia ai tatou te galulue mo le Atua.
- iii. Ona o le malosi o lo tatou soli o tulafono ma poloaiga a le Atua, talu ai lo tatou naunau i le oa ma le tamaoaiga.

Tatou tatalo ile Atua:-

- i. Ina ia avea lenei vaiaso tatou te faatauaina ai le ola tatalo, ma faatalitali ma le mautinoa, e le tuulafoaiina i tatou e lo tatou Matai.
- ii. Ina ia mautinoa i o tatou loto o le faigamalaga faale-Talalelei e ui ina malolo, a’o le malaga e nofo ae olo, ona o le tele o feau ua valaauina i ai i tatou e le Atua.
- iii. Ina ia tatou faapaiaina ma faatau le Aso Sapati e malolo ma tapuai ai i le Atua.

Oketopa 21 – 27, 2018

Tusi Faitau: Ieremia 4: 1 – 4

Matua: Ieremia 4:3....Aua o loo fa’apea ona fetalai mai o le Alii i tagata o luta ma Ierusalem, ina suatia ia lo outou fanua vaoa, aua fo’i ne’i lulu a outou saito i la’au tuitui.

Manatu Autū: **Toe Sasaa le Fafao**

Tatou faafetai ile Atua:-

- i. Ona ua fai pea le Tusi Paia ma faasino ala mo i tatou uma, ina ia tatou iloa ai ona salamo ma toe foi atu i le Alii.
- ii. Ona o faamanatu taua o loo alagaina pea e le leo faa-perofeta o le Talalelei i Aso Sa taitasi.
- iii. Ona o le tuuavanoa pea o le Atua i o tatou tagata faatauva ma le agasala.

Tatou faatoese ile Atua:-

- i. Ona o le punitia o manuia sautualasi o le Atua o loo fia sasaa mai, talu ai lo tatou fiafia e ola i le agasala ma le amioleaga.
- ii. Ona o lo tatou faagalo o le Atua I taimi e sologa lelei ai lo tatou ola.
- iii. Ona o le le fautuaina o o tatou tagata ua tele ai ina tatou le faalogo i le tuualalo a le Agaga Paia.

Tatou tatalo ile Atua:-

- i. Ina ia tatou iloa uma ona salamo ma toe foi atu i le Alii, i le agaga ma le faamaoni.
- ii. Ina ia faafoeina e le Agaga o le Atua lo tatou ola i mea uma, ae le o lo tatou lava potu ma le iloa.
- iii. Ina ia tatou maua uma le tofa ma le agaga fetalai, e fetuunai ai le faautaga ma le moe saili, i itu uma o lo'o lape ai la tatou tautua ma le auaunaga mo le Atua.

NOVEMA

Oketopa 28 – Novema 3, 2018

Tusi Faitau: Luka 17: 15 – 19

Matua: Luka 17:15-16...O le tasi o i latou, ua na iloa ua fa'amaloloina o ia, ona toe fo'i mai lea o ia, ua vivii atu i le Atua ma le leo tele, ua faapau fao ia i ona vae, ua fa'afetai mai ia te la, ole Samaria fo'i o ia.

Manatu Autū: **Nei galo se faafetai i le Atua.**

Tatou faafetai ile Atua:-

- i. Ona ua mavae atu se vaega tele o feau ma galuega o lenei tausaga, a'o faatumauiina pea le malosi ma le fiafia e auuuna ma tautua le Atua, e ala i lana Ekalesia.
- ii. Ona o le tele o faamanuiaga eseese ua tatou maua, ua faaalua ai pea le alofa le mavae o le Atua mo i tatou.
- iii. Ona o le tele pea o malo ma atunuu ma tagata mai fafo, o lo'o alolofa ma agalelei mai mo i tatou.

Tatou faatoese ile Atua:-

- i. Ona ua tatou sapi i tamaoaiga e tele o le Atua ae ua tatou maua ula futifuti.
- ii. Ona ua galo ia te i tatou ona faafoi le viiga ma le faafetai i le Atua, ina ua tatou faamuamua o tatou tagata ae faamulimuli le Alii.
- iii. Ona ua tele ina gata i o tatou laugutu le agaga o le faafetai, a ua le o'oo'o i o tatou loto.

Tatou tatalo ile Atua:-

- i. Ina ia faatumulia i tatou uma i le agaga fia vivii i le Atua i aso uma.
- ii. Ina ia tatou lagonaina uma le agaga faafetai i le Atua, ona o galuega ma mea lelei ua faia e isi tagata mo i tatou.
- iii. Ina ia tutusa lo tatou fia vivii ma faafetai i le Atua i taimi o le sologa lelei, atoa ma taimi e le sologa lelei ai le olaga.

Novema 4 – 10, 2018

Tusi Faitau: Sapakuka 2: 1 – 3

Matua: Sapakuka 2:1....Ou te tu i le mea ou te leoleo ai, ou te tu fo'i a'u i le olo, ou te va'ava'ai fo'i ina ia ou iloa pe se a fo'i se mea ou te tali atu ai i la'u finauga.

Manatu Autū: **O e tumau ile tulaga ua vala'auina ai oe e le Atua?**

Tatou faafeai ile Atua:-

- i. Ona o le valaauina o i tatou e le Atua e ui ina tatou femoumuai ma le tumau i ona luma.
- ii. Ona o le lafoa'iina e lesu o lona valaauina ma lona tulaga faa- Leoleo mamoe lelei, a'o feagai ma faigata.

- iii. Ona o ona tulaga aao i lana galuega ua fai lea ma faataitaiga mo i tatou.

Tatou faatoese ile Atua:-

- i. Ona ua tatou tuua o tatou tulaga na valaauina ai i tatou, ona o le fiugofie ma le faavaivai.
- ii. Ona o lo tatou masalosalo pea ma lo tatou manatu faasamasamanoa i lo tatou valaauina mai le Atua.
- iii. Ona sei iloga lava o taimi o puapuaga ma faigata ona tatou tumau lea ma faamaoni, ae a sologa lelei loa mea uma, ona galo loa lea o lo tatou valaauina.

Tatou tatalo ile Atua:-

- i. Ina ia tatou maua uma le loto tele tatou te tumau ai, i taimi o puapuaga ma faigata o le olaga.
- ii. Ina ia faatutumuina pea i tatou i le tumu atoatoa o lesu, aua le faataunuuna o le tatou valaauina.
- iii. Ina ia faamanuia le Atua i tama fanau uma a le atunuu i tafa eseese o le lalolagi, o loo nonofo ma aumau ai.

Novema 11 – 17, 2018

Tusi Faitau: Kenese 4: 4 – 6

Matua: Kenese 4:4....A o Apelu, ua ia avatu foi ulua'i tama a lona lafu, o e pepeti ai lava. Ua silasila mai le Alii ia Apelu, atoa ma lana taulaga;

Manatu Autū: **Ia mua i le Atua lau fa'asoa.**

Tatou faafetai ile Atua:-

- i. Ona o lesu o le faapolopolo ma le ulumatua o mea uma, ua foaiina mai mo i tatou.
- ii. Ona ua fai lea ma faataitaiga sili i le soifua foai, ma le ofoina atu o o tatou tagata i le Atua.
- iii. Ona o lona soifua faasoa foi, ua aoaoina ai i tatou, ina ia tatou iloa ona faasoa atu i isi o tatou uso a tagata.

Tatou faatoese ile Atua:-

- i. Ona ua tele ina to le inati o le Alii i toega o a tatou filiga.
- ii. Ona ua tatou le faatauaina ma melea lana faasoa paia i lea aso ma lea aso.
- iii. Ona ua tatou ave le inati o le Alii ma le muimui ma le musua.

Tatou tatalo ile Atua:-

- i. Ina ia faapupulaina o tatou loto i le ala ma le mafuaaga, na afua ai lana foai paia.
- ii. Mo tagata Kerisiano uma o le lalolagi o lo'o tau fai galulue e faasoa le alofa o le Alii, ina ia tumau i o latou luga uma le filemu o le Atua.
- iii. Ina ia avea I tatou uma ma faataitaiga sili o le ola faasoa o Keriso, i totonu o o tatou aiga o nuu ma Ekalesia.

Novema 18 – 24, 2018

Tusi Faitau: Ioane 21: 9 – 12

Matua: Ioane 21:10....Ua fetalai atu Iesu ia te i latou, “Au mai ia nisi i’a ua outou maua nei.”

Manatu Autū: Sasa'a i le Matai lau ola.

Tatou faafetai ile Atua:-

- i. Ona o le faiva faaola o le Alii, ua sasaa faaoti mai i lo tatou lalolagi agasala.
- ii. Ona o le alafua ua faataoto mai e le tautai, mo i tatou le autautai lima mamau.
- iii. Ona o ai i tatou ua momomo ai le Alii, ina ua ia tuua lona nofoalii ma lona mamalu?

Tatou faatoese ile Atua:-

- i. Ona o le faa'afa'afa ona sasaa o a tatou faatautaiga i le Alii.
- ii. Ona tatou te le fia malamalama i le uiga loloto o lona aao mafola mai mo i tatou.
- iii. Ona o lo tatou manumanu ma le mata'ū e faasoa ma foai mo le Atua.

Tatou tatalo ile Atua:-

- i. Ina ia aoao mai pea e le Tautai sili, auala eseese o faamanuiaga faale-agaga, e faatino ai la tatou tautua ma le auaunaga.
- ii. Ina ia taitaiina pea e le Agaga o le Atua le Ekalesia ma o tatou tagata, i feau ma galuega o totoe o lenei tausaga.
- iii. Ina ia sasaa uma atu meaalofo a le Atua ua i o outou aao ma o matou lima mo lona finagalo ma lona viiga.

TESEMA

Novema 25 – Tesema 1, 2018

Tusi Faitau: Tanielu 4: 28 – 33

Matua: Tanielu 4:30....Ua fai ane le tupu, ua fa’apea ane, E le o Papelonía tele ea lenei, na a’u faia i lo’u malosi tele lava, e fai fale o le malo, ia viia ai foi lo’u mamalu?

Manatu Autū: **Fautauta i le Faaeaina**

Tatou faafetai ile Atua:-

- i. Ona o meaalofa a le Atua ua faaeaina ai o tatou tagata.
- ii. Ona o lona tatalaina pea o le avanoa tatou te sailiili atu ai mo mea sili, aua so tatou manuia ma a tatou fanau.
- iii. Ona e ui lava ina tatou o ese ma lona finagalo i le tele o taimi, a’o loo tumau pea lona alofa mo i tatou.

Tatou faatoese ile Atua:-

- i. Ona ua faafefeteina o tatou loto, ina ua tatou maua le malosi ma le atamai, o mamalu ma le tamaoaiga mai le Atua.
- ii. Ona ua laualuga i le faatinoga o la tatou tautua mo le Atua, le matape’ape’a ma le manatu faapito.
- iii. Ona o le tatou faamaualuga ma le mimitavale, ua leai ai se faautauta e faataunuu ai o tatou tofi ma tiute.

Tatou tatalo ile Atua:-

- i. Ina ia foai mai e le Agaga o le Atua ia te i tatou uma, le faautauta ma le atamai aua faiva o tatou feagai ai.
- ii. Ina ia pipii pea loto o tagata uma, ae maise o o tatou Taitai i le Alii i taimi uma, ona mautinoa lea o le manuia o lo tatou atunuu.
- iii. Ina ia manino pea i le vaai a tagata uma o si o tatou atunuu, o mea uma ua i o outou aao ma o matou lima o mea a le Atua, ae le ni a tatou mea.

Tesema 2 - 8, 2018

Tusi Faitau: Galuega 27: 29 – 32

Matua: Galuega 27:31....Ua fai atu Paulo ile ta’ita’i o le to’aselau ma tagata tau, “Afaí e le tumau i latou na i le va’a, e le mafai ona fa’aolaina o outou.”

Manatu Autū: Tumau i totonu ole va'atele aua o loo iai faatasi ma le Alii.

Tatou faafetai ile Atua:-

- i. Ona o lesu o le vaatele o le faamoemoega o folauga soua o le ola nei.
- ii. Ona e mautinoa pea lona auai mai, pe a siomia i tatou e peau vale o le olaga.
- iii. Ona o ia o le tatou mapusaga, pe a o'o ina lugaluga le tai o puapuaga ma faafiatauli.

Tatou faatoese ile Atua:-

- i. Ona ua tatou lafoai le vaatele a ua tatou faamoemoe i lo tatou malosi.
- ii. Ona o lo tatou le mautonu ma popole pea, e galo ai le Alii o lo'o failalaga faatasi pea ma i tatou.
- iii. Ona a o'o ina tatou magoto i le loloto o le agasala, e aapa mai pea lona aao laveai.

Tatou tatalo ile Atua:-

- i. Ina ia tumau pea lo tatou faatuatua i le Alii, aua a aunoa ma la, e i'uvale a tatou fuafuaga uma.
- ii. Tatou tatalo mo i latou uma o loo mafatia ma tigaina i soo se auala, ona ua latou faagalo le Alii, ina ia pa'i atu i o latou loto lona alofa ma lona filemu.
- iii. Ina ia manino foi ia te i tatou uma, ua na'o le tumau fa'amaoni i le Ali'i, tatou te maua ai le fiafia ma le saogalemu.

Tesema 9 - 15, 2018

Tusi Faitau: Salamo 127: 3 – 5

Matua: Salamo127:3...Fa'auta, o le fanau, o le tofi lea mai le Alii, o e ua fananau mai, o le taui lea mai ia te la.

Manatu Autū: **O faiva tapena mae'ae'a a Matua.**

Tatou faafetai ile Atua:-

- i. Ona o le fesoasoani a le Atua i matua, ua toai taunuu mai ai ma le manuia i siui o lenei tausaga, o latou faiva alofilima.
- ii. Ona ua fai pea le Tusi Paia ma faasino ala i matua, i le faatinoga o le latou galuega taua.

- iii. Ona o le soifua galulue punouai ma le le faalogologo tiga o matua, i le tauaveina o o latou tiute fai.

Tatou faatoese ile Atua:-

- i. Ona ua faatamala ma faatalale ni isi o matua i le tapenaina o le fanau mo le lumana'i.
- ii. Ona o faaitaiga le lelei ua faia e matua i luma o fanau, pe a oo ina tauaimisa ma fefulituaai.
- iii. Ona ua leiloa e fanau matua ina ua tele le iloa ma le poto faanei ona po.

Tatou tatalo ile Atua:-

- i. Ina ia foai mai le lotomau ma le faapalepale ia te i tatou o matua, e faatino ai le tatou matupalapala mai le Alii.
- ii. Ina ia maua pea e i tatou uma o matua le malosi ma le faamaoni, e saunia ai fanau mo le lumana'i.
- iii. Ina ia foai e le Atua le alofa ma le ususita'i i loto o a tatou fanau.

Tesema 16 - 22, 2018

Tusi Faitau: Ioane 6: 8 -13

Matua: Ioane 6:9....O lo'o i'inei le tama o ia te ia areto karate e lima, ma nai i'a iti e lua lau, a e auma ea ia mea ia i latou e to'atele?

Manatu Autū: Fa'aogaina e le Atua fanau mo lona finagalo.

Tatou faafetai ile Atua:-

- i. Ona o le molimau a Ioane ua faailoa mai ai e o'o lava i le fanau, e i ai lo latou sao e manaomia.
- ii. Ona o le faaogaina o tupulaga talavou e aoao mai ai le Talalelei.
- iii. Ona o fanau e faamoemoe i ai le lumana'i manuia o aiga, o nuu, o malo ma atunuu, faapea foi ma Ekalesia.

Tatou faatoese ile Atua:-

- i. Ona ua le toe mamafa i fanau le ola aoaoina lelei, e le gata i le itu i le tino a ua faapea foi i le itu faal-eagaga.
- ii. Ona ua le tuā matua ma aiga, faapea nuu ma Ekalesia, ona ua taumamao fanau ma le taupulea a latou amio.
- iii. Ona o le faatamala o fanau ua faaletonu ai iuga o a latou taumafaiga faale-aoaoga o lenei tausaga.

Tatou tatalo ile Atua:-

- i. Ina ia iloa manino e fanau o i latou e tua i ai matua ma aiga, ae maise foi o nuu ma Ekalesia.
- ii. Ina ia puipui pea ma laveai e le Atua le ola o fanau, i aso uma e le aunoa.
- iii. Ina ia maua uma e matua ma fanau le agaga o le tutu ma galulue faatasi ma faatuatua ma faamoemoe i le Atua, ona mautinoa lea o le manuia o mea uma.

Tesema 23 - 31, 2018

Tusi Faitau: Eperu 1: 1 – 4

Matua: Eperu 1:1-2....O le Atua, na fetalai mai anamua i o tatou Tama e ala mai i perofeta, na auaua'i mai i faiga eseese, a ua fetalai mai ia te i tatou i nei ona aso e gata ai e ala mai i le Alo, o le ua tofia e la e fai mea uma lava mona tofi, na ia faia foi mea uma e ala ia te la.

Manatu Autū: **O le Talalelei e nofo ae Olo.**

Tatou faafetai ile Atua:-

- i. Ona o le finagalo alofa o le Atua ua ia saili mai ai pea mo i tatou.
- ii. Ona o lesu ua ofoina mai lona soifua e togiola ai o tatou tagata agasala.
- iii. Ona o le maliu o le tatou Alii Faaola ma lona toetu, o le atoaga lea o le alofa tunoa o le Atua mo i tatou.

Tatou faatoese ile Atua:-

- i. Ona ua tatou musua e tala'i atu le talalelei, ona ua tatou ave le faamuamua i a tatou tu ma aga masani faale-tagata.
- ii. Ona ua avea a tatou amioga le taupulea, e fai ma mea ua solomuli ai ni isi tagata ma le Talalelei.
- iii. Ona tatou te fiafia tele e taua i tatou o tagata o le Talalelei, ae tatou te le savavali ai.

Tatou tatalo ile Atua:-

- i. Ina ia aua nei muta le molimauina pea o le Talalelei e le Agaga o le Atua, i o tatou loto ma agaga.
- ii. Ina ia alu pea ma le mana o lau Afio le feau o le Talalelei, i tulimanu uma o le lalolagi.
- iii. Ina ia manatua pea e tagata Samoa uma, o le Alii o le Talalelei, o le faavae lea o le atunuu.

